



ZIRTAKA
ponentzia

MA





ZIRTAKA
P o n e n t z i a





AURKIBIDEA



1. Sarrera
 - 1.1. Gazte Antolakundearen izaera
 - 1.2. Ernai Ezker Abertzalearen baitan
2. Fase politikoa
 - 2.1. Orain arteko jardunak irekitako aukerak
 - 2.2. Fase politikoaren helburu orokorrak
3. Filosofia orokorra
 - 3-1. Eginkizun ezberdinetarako eragin eremu ezberdinak
 - 3-2. Nazio Estrategia
 - 3-3. Estrategiaren ezaugarritzea
 - 3-3-1. Boteretzeta: Nazio Eraikuntza autoeraketaren oinarri
 - 3-3-2. Txinaurri lana eta lan filosofia
 - 3-3-3. Pedagogia independentista
4. Iparrorratza
 - 4-1. Gazte Mugimenduetako espresio ezberdinetatik eraginez
 - 4.1.1. Proiektu alternatiboen funtzio estrategikoa
 - 4.1.2. Aldarrikapen mugimenduen funtzio estrategikoa
 - 4-2. Aldarri independentistarako tresna berriak
 - 4-3. Ernairen ekintza politikoa
 - 4-3-1. Eskaintza soziala independentismoaren abiapunturako
 - 4-3-2. Garapen komunikatiboa eraginkortu
5. Gatazkaren ondorioak
 - 5.1. Preso eta iheslariak
 - 5.2. Indar errepresiboak
 - 5.3. Memoria
 - 5.4. Jazarpena
6. Hezkuntza ildoak eta heziguneak
 - 6.1. Hezkuntza ildoan eman beharreko hausnarketa estrategikoa
 - 6.2. Antolatze irizpideak
7. Funtzionamendua
 - 7.1. Funtzionamendu orokorra
 - 7.1.1. Baloreak gure praktikaren oinarri
 - 7.1.2. Norabide bikoitzeko konpromisoak: Nik kolektiboari, kolektiboak niri
 - 7.1.3. Ernaitik Ezker Abertzalea sortuz
 - 7.1.4. Militantzia zikloa
 - 7.1.5. Militantzia sostengarria
 - 7.2. Funtzionamendua feministarantz
 - 7.2.1. Arduradun ereduak eraldatzen, erreferentziak sortzen
 - 7.2.2. Interlokuzioa: informazioa, erabakiak... gurekin ala ez!
 - 7.2.3. Antolakunde feminsitaren oinarria ahaldundutako neskek
 - 7.2.4. Barne antolaketa: osasuna funtzio bihurtzen
 - 7.2.5. Betoa eta planteamenduen errebeisio feministak
 - 7.3. Jardun deszentralizatuaren oinarria: autonomia

8. Antolakuntza

8.1. Nazio egituratzeaz

8.2. Militantzia osoa batzen duten espazioak

8.2.1. Bilgune Orokorrak

8.2.2. Herrialdeko Bilguneak

8.3. Herri eta auzoak antolakundearen oinarri

8.3.1. Identifikatutako hutsuneak, antolaketarako irakaspen

8.3.2. Neurri proposamenak

8.3.3. Egiturarekiko loturak

8.3.4. Errealitate ezberdinak

8.3.4.1. Hiriburuak

8.3.4.2. Herri txikiak

8.3.4.3. Eskualdeak

8.2.5. Nazio Eraikuntza

8.2.5.1. Herrialdeka ildokako sareak

8.2.5.1.1. Ildo ezberdinetako sareak

8.2.5.1.2. Formakuntzako sarea

8.2.5.1.3. Hezkuntza sarea

9. Barne Prozesuak

9.1. Helburuak

9.2. Prozesu feminista

9.3. Prozesu internazionalista

9.4. Formakuntza

9.5. Euskara

10. Zirtatu!

A dark teal background with a white diagonal line running from the top left towards the center. The text 'GAZTE ESTRATEGIA' is written in white, bold, uppercase letters, tilted to follow the angle of the white line.

GAZTE ESTRATEGIA

1. Sarrera

¿Cómo interpretar la palabra “pronto” en la afirmación de que “surgirá pronto un auge revolucionario”? Muchos camaradas se hacen la misma pregunta. Los marxistas no son adivinos. Deben y pueden señalar sólo el rumbo general del desarrollo futuro y los cambios venideros; no deben ni pueden fijar en forma mecánica el día y la hora. Sin embargo, cuando digo que surgirá pronto un auge revolucionario en China, de ningún modo me refiero a algo que, según dicen algunos, “tiene la posibilidad de surgir”, algo ilusorio, inalcanzable y absolutamente desprovisto de significado práctico. El auge revolucionario es como un barco en el mar, del cual se divisa ya desde la costa la punta del mástil; es como el sol naciente, cuyos rayos luminosos se ven a lo lejos en el Oriente desde la cumbre de una alta montaña; es como una criatura que va a nacer y se agita impaciente en el vientre de la madre.

- Mao Zedong -

Garaipenaren belaunaldia gara. Eta ez dugu harrokeriarekin esaten, premonizio gisa baizik. Ez gara garaipenaren eguna halako batean agertuko dela zin egiten ari. Hau ez da meza. Garaipena gure baitan den borroka dela dakigulako esaten dugu hori. Ez diogu inori utziko iraultza pasa den mendeko fetitxe gisa azaltzen. Guk iraultza egingo dugu. Edo behintzat saiatuko gara. Eta garaipeneraino borrokatuko duen belaunaldia izatera konprometitzen gara.

Azken urteetan Euskal Herriko gazteok berriz erakutsi dugu gai garela momentu zailenetan irudimenez ekimen berriak proposatu eta gure herriaren oraina eta etorkizuna eraldatzeko. Herri Harresiak, hamaika gaztetxeren okupazioa, Herri Unibertsitateak, Presoen aldeko Denak ala inor ez dinamikak, neska gazte taldeen sorrera, ikasle greba arrakastatsuak, Errekaleor auzo autogestionatua, Gazte Asanbladen antolaketak, prekarietatea salatzeo hamaika ekimen, Gazteraike topaketak, euskalgintzan gazte mailan emandako urratsak, baratzeen okupazioak... kontraesanekin eta aniztasunez, harro egon gaitezke euskal gazteriak erakutsitako grinaz. Eta Ernaiko kideok ere harro egon gaitezke borroka guzti hauetan egindako ekarpen xumeengatik.

Akatsetatik ikastea dagokigu orain; ez dira gutxi, noski. Kongresu prozesu honetan bereziki egokitzapen organizatiboek izango dute garrantzia: antolakunde feminista baterantz urratsak ematen jarraituko dugu. Mundua eraldatzeko, gure buruak ere eraldatu behar ditugulako. Bizitzak erdigunean jarriko dituen antolakunde birsortzea egokitu zaigun belaunaldia gara.

Gazte gara eta gure zapalkuntzei aurre egiteko antolatzen gara. Pertsona eta herrien emantzipazioa dugu ardatz, askatasuna helburu. Praxi politiko eta jarduteko modu berrituak mahaigaineratzera gatoz: Gazte Boterearen eraikuntzan sakontzera goaz, Euskal Herriko prozesu eratzaillearen mesedetan. Gazteok problematika berezitua bizi dugu. Gazte izateagatik zapalkuntza anitzak (nazio ukatuan bizitzea, bizirauteko gure lan indarra saldu behar duen gehiengo esplotatuaren parte izatea, patriarkatuak bazterrean dituen emakumeak izatea,

gorputz ez normatiboak izatea) areagotzen dira. Sistemak, gazteok klase zapaltzaileek esleitu diguten papera bete dezagun, Botere Helduaren beharra du ezinbestean. Alienaziorako, sistemaren birproduktzio mekanismo guzti horiek dira botere heldua elikatzen dutenak: familia, hezkuntza, komunikabideak, produkzio eta harreman ereduak... "hau beti izan da horrela, ez da aldatuko. Es lo que hay". Eta zapalkuntza betiketuz doa. Hau guztia iraultzeko atxikitzen gaitzaizkio estrategia bati. Zapalkuntza hauek kolektiboki gainditzeko antolatzen gara. Gazte askeak nahi ditugulako Herri libre batean.

Horregatik, *Prozesu independentista eraldatzailea* bururaino eramango duen belaunaldia gara. Eta ez dugu promesa gisa esaten, konpromiso bat hartzen ari gara. Gazte borroka inoiz garatu ez den eremura eramateko apustuarekin batera, prozesu eratzaille bat abiatuko dugu gaurdanik. Gazte Boterea eta Herri Boterea erdigunean jarriko dituen prozesu autoeratzaille bat. Euskal Langile Herriak behar dituen autogestio tresnen bitartez emantzipazio esparruak garatuko ditugu, horrenbeste amesten dugun Euskal Herria independente, sozialista eta feminista lortzeraino.

Garaipenera goaz, baina memoriarekin. Ez gara lehenak, ezta azkenak izango ere. Erantzukizun horrekin hartzen dugu konpromisoa. Ernaiko kideok umiltasunez, gure paper txikia onartuta, bakoitzak bere alea jarri behar duela jakitun, iraultzarako oinarriak jartzen saiatzen gara. Beste askok zarata gehiago egingo dute, baina guk nahiago dugu eguneroko lanean isilpean igaro. Gure akats guztiekin beti hor mantentzen baikara, ikasteko prest, hobetzeko prest, lokatz gehiagoren esperoan. Txinaurri lana da gure marka. Ez dugu espektakulurik behar, kalea da gure barometroa.

Eguneroko lan isil guzti hauek, ordea, hamaika su txikiren pizgarriak dira. Eta su horiek mantentzeko lan nekezaz gain, beste hainbat pizteko ardura hartzen dugu. Txinparten txinaurriak gara.

1930eko urtarilaren 5ean Mao Zedongek "*zirta bakarrak sutu dezake larrea*" izkiriatu zuen, optimismo erradikal eta kritikoari buruzko idatzi eder bat. Errealitatea ezagutu, baldintza objektibo eta subjektiboak aintzat hartu, eta horien gainean, garaipenaren indarrean sinestearen beharra azpimarratzen zuen.

Txinparta, inar, pindar, txinka, zirta bakoitzak erreko du errealitatearen belaze lehorra. Eta guri dagokigu piztea. Han hemenka, isilpean, konspirazioz, zirtaka.

1.1/ Gazte Antolakundearen izaera

Ernai Ezker Abertzalearen baitan kokatzen den gazte antolakunde iraultzailea da, eta Euskal Herri gazte, aske, sozialista, feminista eta euskalduna lortzea du helburu. Zapalkuntza laukoitza -nazio, klase, genero eta helduek eragindakoa- gainditzeko asmoz antolatzen da eta praktika eta balore iraultzaileak suspertzea du helburu.

Gazte Antolakundeak izaera feminista, sozialista, independentista, euskalduna eta internazionalista du. Honek antolakundearen eguneroko jardunean isla edukiko du. Ernairen lana Euskal Herriko gazteriak helburu hauekin bat egitea izango da; honetarako, sektore ezberdinetara heltzeko gai izango den praktika politikoa garatuko dugu, proiektu politikoa eta antolakundea bera gazteentzako erreferente bilakatuz.

Parte hartzea eta aktibazio politikoa suspertu nahian Gazte Antolakundean egitura itxi eta zurrinak baztertuko ditugu, izaera dinamikoagoa duten eruedetara joz. Antolakundearen baitan disponibilitate eta ardura maila ezberdinak barnebiduko ditugu, ahalik eta ekarpen gehien jasotzeko aukerak eskainiz eta honetarako parte hartzerako espazio ezberdinak eskainiz.

Antolakundearen baitan parte hartzea, kritika eta autokritika, eztabaida eta hausnarketa kolektiboak lehentasunezko helburu izango dira, eta militantzia kultura hau gauzagarria izan dadin bitartekoak eskainiko dira. Honek antolakuntza eta funtzionamendu ereduan ondorio zehatzak izango ditu, delegazionismo eta fedea alboratuz, modu kontzientean norbanako eta kolektiboaren erabakiak geure eginez.

1.2/ Ernai Ezker Abertzalearen baitan

60. hamarkadan *gazte zoro batzuek* ETA sortu zutenetik, gazte borrokariok funtsezko eginkizuna izan dugu Ezker Abertzalearen baitan. Freskotasuna, berritasuna, ilusioa eta borroka grina txertatzeko ardura eskuartearen, gazteria eta Askapen Mugimenduaren arteko bitarteko nagusia izan da Gazte Antolakundea. Jarrai Gazte Antolakundearen sorreraz geroztik, euskal gazteriaren gehiengoak Ezker Abertzalea izan du Euskal Nazio Askapen Prozesuaren erreferente, motore eta tresna nagusi.

Ezker Abertzalearen sorrerak, *abertzaletasun iraultzailearen* bidez, ezker españolistekin eta eskuin autonomistekin haustea lortu zuen. Iraultza sozial hark Euskal Herriaren inguruko irakurketa eta etorkizun berri bat marraztea lortu zuen. Baina, komunitate politiko berri bat osatzeaz gain, Euskal Herriaren izana aldatzeko aliantza estrategiko gisa ere eratu zen Ezker Abertzalea.

Euskal Herria sozialista, feminista, euskaldun eta bateratua lortzeko aliantza estrategiko horren ia hirurogei urte luzeko borrokaren baitan, gazte antolakuntzak bere papera eta borrokak momentuko erronka eta fase politikoei egokitzen jakin izan du. Horretarako bitartekoa izan da Gazte Antolakundea. Geroztik, Ezker Abertzalearen baitan borrokatzen dugun gazteok bi zentzutan ulertzen d(it)ugu aliantza estrategiko horren baitan garatu beharreko borroka(k). Batetik, Ezker Abertzalearen estrategia politikoaren baitan gazte ikuspuntutik lan eginez, momentuko ildo politiko orokorraren egokitzapenari gazte ikuspuntua gehituz eta gazte eremura ekarriz. Bestetik, Ezker Abertzalearen proiektu politikoa lortzeko bidean gaur egun gazteria langileak pairatzen duen gazte problematikari erantzuteko tresna gisa gure burua kokatuz, agendan gazte problematika txertatuz, jendartearen joera berrien eztabaidak gehituz, praktika-

teoria politikoan gako berriak txertatuz... Biek ala biek Ezker Abertzale osoak diseinatzeko estrategia politikoari erantzutea dute helburu.

Horregatik, Ernai gazte antolakundearen II. Kongresu honetan Gazte Estrategiaren egokitzapena eta antolakundearen moldaketa organikoa bi oinarri horietatik ulertzen dugu: *Abianek* zehaztutako erabaki eta hausnarketak gure egin eta bere ekinbide politikoa bide horretan kokatzeko apustua, batetik, eta Gazte Mugimenduek egun bizi duten erronkei begira zein gazteriari begirako egin beharreko apustua, bestetik.

Abianen zehaztu bezala, Ezker Abertzaleak erreferentzia politiko nagusi baten beharra du, mugimendu politiko osoaren aterpea, alegia. Sorturi berari dagokio Ezker Abertzalearen baitan kokatzen diren herritar guztien bilgune politikoa izatea eta prozesu independentista eraldatzailearen mesedetan antolatzea. Sortu ildo politikoaren, irismen luzeko hausnarketen eztabaidagunea eta Ezker Abertzalearen eztabaida kolektiboa garatzeko esparruen dinamizatzailea den heinean, bertan parte hartu eta eragiteko erantzukizun berezia dugu gazteok.

Sorturekin ez ezik, Ezker Abertzalea mugimendu politiko gisa eta Euskal Nazio Askapen Mugimendua osatzen duten beste bidelagunekin harremanak estutu eta elkarlanerako esparruak bilatu beharko ditugu. Zentzu horretan, LAB sindikatuarekin –gure erreferentziazko klase sindikatu eta langileon defentsan eta borroka sozioekonomikoetan bidelagun delako–, EPPK eta EIPKrekin – euskal errepresaliatu politikoen bi kolektibo erreferente nagusiak izanik– eta EHBildurekin –erreferente instituzional nagusia izanik– sinergiak bilatzea izango da lehentasunezkoa. Eta, nola ez, euskalgintza, feminismoa, internazionalismoa... borrokatzen duten herri eragileekin ere.

Hala bada, Gazte Antolakundearen bitartez, Gazte Estrategia propio bat garatu behar dugu. Gazte Estrategia Ezker Abertzalearen estrategia politikoak gazte mailan duen egokitzapena da, gazteok diseinatua eta gazte perspektibara egokitua. Gazteria langilea subjektu nagusi gisa kokatuz eta gure problematika berezituak aintzat hartuz garatzen dugun estrategia da. Beraz, gurea ez da bide isolatua, ez da ildo politiko orokorrarekiko independentea den estrategia, baina bai autonomoki garatu beharreko jarduna.

Ezker Abertzaleko militanteak garenez, mugimendua biziberritzeko ardua berezia dugu, Gazte Antolakundea izango baita gazte belaunaldi berriak borrokaratuko dituen. Ematen ditugun hausnarketa eta praktikez blaitu behar dugu Ezker Abertzalea, akatsetatik ikasteko eta asmatutakoen eragina biderkatzeko; Estrategia Independentista Eraldatzaileak aurrera egingo badu, halaber beharrez Ezker Abertzalearen proiektu politikoa ahalik eta gazte gehienei zabaldu beharko diegu. Gazteria formatu eta politikoki eragiteko gaitasuna eskuratzeko erantzukizuna gure gain hartu behar dugu.

2. Fase politikoa

2.1/ Orain arteko jardunak irekitako aukerak

Ernairen sorreraren ostean, lau urteko fase bat aurreikusi eta epe ertaineko Gazte Estrategia zehaztu genuen. Orain arte definitutako faseen logikak Gazte Mugimenduen egoera makala zuen abiapuntu. Ilegalizazioaren hamarkada, aurreko gazte antolakundearen desagertzea eta askapen mugimenduak bizi zuen aldaketa egoeraren ondorio zuzenak bizi genituen. Beraz, Gazte Mugimenduetan borrokak pizteak izan behar zuen lehentasuna: “herri bat hamaika borroka” filosofia proposatzen genuen, eremuz eremu espazioak sortzera bideratua. Lehentasunak ere markatu genituen: etxebizitza, lana, hezkuntza eta feminismoa.

Hainbat izan dira bide horretan topatu ditugun oztopoak. Ez dugu borroken aktibaziorako tresna nahikoa izan, eta sortutako espazio eta borroka gehienetan norabide falta izan dugu. Gazte Mugimenduekin elkarlanerako aurretik egondako esperientzia eta ereduak mesfidantzaz ikustearen ondorioz, Gazte Mugimenduekiko Ernairen funtzioa definitzeko arazo asko izan ditugu eta martxa hartzea kostatu zaigu.

Bi elementu nagusi hauen ondorio zuzena da borroken sorrera faseak uste baino askoz gehiago kostatu izana. Norabide argi baten faltan, “aktibazioa aktibazioagatik” formulak orokorrean ez du balio izan. Norabide eta eredu praktikoak falta zitzaizkigun.

Analisi hau aintzat hartuz, Gazte Problematika erdigunean jartzearen eta hau alternatiben bidez borrokatzearen aldeko apustua egin dugu fase honen amaierako eta datorrenerako abiapuntu gisa. Helburua ez da soilik “alternatibak eraikitzea”, baizik eta kultura politiko berri baten sorreraren bidez borrokatzea eta antolatzea burujabetza prozesua elikatzeke.

Azken lau urteetako garapenak, Gazte Antolakundearen erreferentzia lausotzea ekarri du. Ez gara gai izan gazteriarengana behar bezala hurbiltzeko, ezta erreferentzia politiko propio bat garatzeko ere. Aurreko fase politikoaren eta fase politiko berri baten erdian, gazte borrokalarion identitate eta borrokaren kontaketa berri bat eraikitzeke hankamotz ibili gara, nahi eta ezinean, behin eta berriz saiaketa-akatsari ekinez.

Hala ere, emandako urratsak ez dira gutxi. Gazte Antolakundearen izaera berregokitu eta borrokarako grina berpizten jakin izan dugu. Belaunaldi oso batentzat antolatzeke tresna nagusia izan da Ernai, eta izaten jarraitzeke apustuan berresten gara.

2.2/ Fase politikoaren helburu orokorrak

Ezker Abertzalea Prozesu Independentista Eraldatzailean martxan jartzera goaz. Horretarako, gazteriaren gehiengoak hautabide independentistarekin bat egitea

da fase politikoaren helburu nagusia. Abiapuntu gisa abertzaletasuna duen independentismotik harago, hamaika arrazoiren ondoriozko independentismoari ateak ireki behar dizkiogu.

Euskal Herri independente, sozialista eta feministaren bidean gazte borrokaren paradigma berria praktikara eraman behar dugu. Euskal Sozialismoa gaurdanik eraikitzen hastera eta independentziaren aldeko gehiengo sozialak eraikitzen goaz. Burujabetza prozesuan aurrera egitera herri eta klase burujabetza erdigunean jarriko duten proiektuak eraikiko ditugu bizitzaren esparru guztietan.

Erronka hauei erantzuteko lau helburu nagusi zehaztu ditugu fase politiko honen hastapenetan:

1 | Sistema kapitalista heteropatriarkal espainiarrek eragindako zapalkuntzen hegemoniari aurre egin eta nazio eraikuntzari (eta bere fase garatuenean estatugintzari) ekarpena egingo dion kontraboterea artikulatzea.

Gazte Boterearen eraikuntzan salto kualitatibo bat eman ahal izateko, abstrakzioetan oinarritutako aldarrikapen orokorrak gainditu eta boterea lehiatuko duten proposamen eta planteamendu zehatzak garatzera igaro behar gara. Kontrabotere gisa errotu eta botere baldintzatzaile izatera igaro ahal izateko bideari ekin behar diogu, biharko Euskal Herria gaurdanik eraikiz. Bizi ditugun zapalkuntzen aurrean Alternatiba gu geu garelako sinetsita, botere espazioak eraikiko ditugu eremuz eremu.

2 | Burujabetza sozialaren aldeko hautua egina duten gazte sektoreekin aritzeko pedagogia independentistarako bitartekoak sortzea. Hau da, gaur egun, klase borroka eta borroka nazionala txanpon beraren bi aldeak direla azaldu eta erabateko burujabetza eskuratu ahal izateko fase historiko honetan estatu baten beharra dugula azaleratzea.

3 | Gazteria independentista artikulatzea, independentziaren alde egoteaz gain, independentziaren alde egin dezan. Dagoeneko independentziaren aldeko hautua egina dugun gazte independentistok independentziaren aldeko aldarria zabaldu ahal izateko lanetan murgildu behar gara, independentista berriak sortzeko ezinbesteko katebegi izan gaitezten.

4 | Gazte Antolakundea berregituratu eta indartzea. Proiektu politikoaren aldeko borroka ideologikoa eta agendan eragiteko gaitasuna indartzea.

Ilde politiko propioa zehaztu eta Ezker Abertzalearen proiektu politikoaren alde egiten duten gazteei borrokarako aukerak biderkatu behar dizkiegu. Militantzia barruan baldintza subjektiboak hobetu eta egitasmoak sortzeko eta koitunturari erantzuteko baldintzak hobetu behar ditugu.

3. Filosofia orokorra

3.1/ Eginkizun ezberdinetarako eragin eremu ezberdinak

Euskal Herriko gazteria langilea da artikulatu nahi dugun subjektu politikoa. Gazte Langileok, Euskal Herria Langilea osatzen dugun sektore garen heinean, sistema kapitalistaren oinarri esplotatuena gara, ekoizpen harremanetan dugun menpekotasun egoeragatik eta honen baitan dugun prekarietate edo bazterketagatik. Gazteok dugun zaurgarritasun egoeragatik eta sistemarekiko integrazio maila baxuagatik, langile herriaren barruan gaitasun iraultzaile handiena duen sektorea gara.

Gure jarduna langile herriaren baitako gazteriarengana zuzentzeak eragin gunea mugatzen duela dirudien arren, diskurtso mailan ez da horren sinplea. Izan ere, Euskal Gazteria Langilearen baitan ehunka eragin eremu eta norabide ezberdin planteatu behar ditugu, ehunka baitira EGLren baitan dauden errealtate objektibo zein subjektiboak.

Ernai gazteria iraultzailea Ezker Abertzalearen baitan aktibatzeko praktika politikoen isla da. Gazte Antolakundearen proiektu politikoaren alde dagoen baina egunerokotasunean alde egiten ez duen oinarri sozial zabala dugu; politikoki elikatu behar da eta lanerako esparruak (puntualak badira ere) eskaini behar zaizkio. Aitzitik, badira gure proiektu politikoarekin edota militantzia kultura, erritmo eta formekin erabat bat egiten ez duten baina sinergiak garatu daitezkeen eremuak.

Batetik, politikoki pasibotasunean kokatzen den gazteria langilea bestelako balore eta praktiken bueltan murgiltzearen alde aritzean dugu erronka. Horretarako, antolatzeko esparru anitzak eskaini behar dizkiogu, asoziazionismorik oinarritzkoenetik antolakuntza egituratuenera.

Bestetik, Gazte Mugimenduak ditugu, gazte problematikari eta era anitzetako emantzipazioei erantzuteko espresio propio eta autonomoetan antolatzen diren gazteek osatuak. Etxe okupa batetik nekazaritararaino, dantza taldeetatik antolakundeetaraino, eztabaida talde batetik neska feministen asanbladetaraino... Gazte Mugimenduetan Ezker Abertzalearen proiektu politikoaren alde egiten duten kideak egonda ere, antolakuntza-espresio gisa autonomoak dira eta gazte problematika dute oinarri. Ernairen erronka sistemaren kontrakotasuna aintzat hartuz ahalik eta gazte gehien Gazte Mugimenduetan antolatzea da.

Azkenik, abertzaletasunarekin edota independentismoarekin bat egiten duen gazteria koka dezakegu. Fase politiko honetan eremu hau zabaltzea garrantzitsua den bezala, bertan kokatzen den gazteria proiektu politikoaren aldeko posizioetara gerturatzea garrantzitsua izango da. Eremu honen antolakuntzak diskurtso independentista Euskal Herriko gazteriarengan hegemonikoa izatea eta Gazte Antolakundeak eragiteko ezintasuna duen gazteriaren sektore ezberdinetara jotzea ahalbidetzen digu, Euskal Herriko gazteria subjektibotasun zabal eta anitzez osatutako subjektu gisa ulertuta.

3.2/ Nazio Estrategia

Euskal Herria oso eta bateratuaren askatasuna lortu nahi dugunez, Euskal Herria subjektu gisa aintzat hartzen duen estrategia bat beharrezkoa zaigu.

Nazio estrategia definitzerako orduan traba nagusi bat dugu gaur gaurkoz: antolaketaarena. Alde batetik, Hego Euskal Herria osoaren errealitate anitzek Gazte Antolakundearen baitan duten isla oso irregularra da: hainbat errealitatek pisu handiagoa hartzen dute strategiaren nondik norakoak definitzerakoan. Bide hau ez da erabaki kontziente baten ondorio; izan ere, eremu ezberdinetako errealitateak antolakundearen hausnarketetan txertatzeko mekanismo faltagatik datorkigu. Modu berean, eztabaida estrategikoetan hainbat eremuk duten pisuaz harago, bada tokian toki strategiaren egokitzapenerako egin beharreko zuzendaritzarekin ditugun zailtasunak.

Bestalde, Ipar eta Hego Euskal Herrian izaera ezberdineko bi gazte antolakunde antolatuta egotea nazio osoa aintzat hartuko duen strategiaren oinarri eta garapenerako oztopoa da. Bi antolaketa-espresio ezberdin izateak hausnarketa estrategikorako eta elkar ezagutzarako markorik ez egotea eragin du. Gainera, ez dugu jakin inposatutako zatiketa administratiboari eta honek eragindako errealitateen hausturari buelta ematen; bi antolakundeen arteko errealitateen eta agenda politikoaren ezagutza irregularra da.

Beraz, Euskal Herria eta euskal gazteria subjektu gisa ulertzen ditugulako, Nazio Estrategia behar dugu eta horretarako urratsak emango ditugu jarrera homogeneousatzaileak baztertuz eta iraganeko akatsetatik ikasiz. Nazio strategiaren ulerkeran sakontzea ezinbestekoa izango da, baita hainbat antolaketa-urrats ematea ere.

Jardun deszentralizatu

Hamaika errealitatez osatutako herria da gurea. Hainbat dira errealitate horiek marrazten dituzten ezaugarriak: banaketa administratiboa, egoera soziolinguistikoa, egitura sozioekonomikoa, demografia, kultura, ehundura soziala... Beraz, esan dezakegu ekonomikoki, politikoki zein kulturalki heterogeneoa den herria dela gurea.

Gazte problematika bera errealitate horien arabera aztertu beharko genuke. Izan ere, lekuan leku gazte problematikak forma jakin bat hartzen du, aipatutako ezaugarri horien arabera. Gazteok lanarekin dugun afera ezin da berdin borrokatu Bilbon eta Abadiñon; etxebizitzaren espekulazioaren ondorioak ezberdinak dira Lapurdiko kostaldean eta Gasteizen; aisialdi eredu alternatiboak sortzeko baldintzak ez dira berdinak Donostian eta Tuteran.

Ondorioz, Gazte Estrategiak errealitate bezainbeste egokitzapen beharko ditu. Nazio Estrategia behar dugula diogu, baina ez strategiak forma edo zehaztapen bakarria duelako leku guztietan, alderantziz; errealitate horiek aintzat hartuz, dagozkien berezitasunen arabera izan beharko da Nazio Estrategia.

Amesten dugun Euskal Herria gaurdanik eraikitzeko bidea egitera goaz, eta ondorioz, bide hori maila ezberdinetan garatu beharko da (herri, eskualde, nazio). Errealitate ezberdinak existituko ez balira bezala jokatu izan dugu askotan; gaurkoan, errealitate horiek aintzat hartu eta horietatik eragitearen mesedetan Gazte Estrategiaren egokitzapenak diseinatu behar ditugula deritzogu. Horregatik, **Gazte Estrategian eremu lokaleko lanketei emango diegu garrantzia**, herrietatik zein eskualdeetatik abiatutako problematikei erantzunez eta horien araberako borrokak eta proiektuak abiatuz. Gazteok hurbiletik ezagutzen dugun errealitatea eraldatzean jarriko ditugu indarrak. Beraz, herriek, eskualdeek zein herrialdeek pisu berezia hartuko dute.

Bestalde, *Abian* Prozesuan zehaztu bezala, Estrategia Independentistaren garapenean Euskal Bideak hiru prozesu eratzaile aurreikusten ditu. Euskal Herriaren autoeratzeko eta autodeterminazio prozesua hiru subjektu erabakitzaileen dinamikan oinarrituriko bat-egite prozesu gisa ulertzen dugu. Beraz, hiru eragin-eremu banatu genituen, hiru subjektu eta hiru erritmo ezberdinak. Ondorioz, eraginguneetako bakoitzean autonomiaz jardun behar dugu, bakoitzean aurkituko ditugun aukerak probestuz. Autonomiaz jarduteak gune bakoitzeko erritmoak eta lehentasunak argi eta tentuz zehazteko aukera emango digu. Gakoa jardun deszentralizatua eta erronka nazionalen arteko oreka egokia mantentzea izango da.

Laburbilduz, tokian tokiko gazte problematikari erantzunez eta gazteriarren ezaugarriak kontuan hartuz jardun beharko du Gazte Antolakundeak. Horretarako, Ernai eraginkortzea beharrezkoa izango da. Tresna bakarra behar dugu, baina ez tresna berbera.

3.3/ Estrategiaren ezaugarritzea

3.3.1 Boteretzea: Nazio Eraikuntza Prozesu Eratzailearen oinarri

Aurreko fase politikoan, eraikuntzaren ikuspegia txertatuta zegoen arren, orduko markoaren agorpena erakustea zen Nazio Eraikuntza estrategiaren norabide orokorra. Hau da, eraikiz oztopo eta debekuekin aurkitzea, muga hauen aurrean gehiengo sozialak artikulatzeko. Eztabaida politikoan *erakustea, ikusaraztea, konturaraztea...* bezalako hitzen erabilerak argi erakusten du zein diren estrategia horren baitan irudikatu izan ditugun ideiak: markoaren agorpena hatzarekin seinalatu izan dugu, gorputzekin horren kontra jo beharrean. Logika honek talka sortzera baino, irudikatzeraz garamatza.

Zentzu horretan, eginkizun ideologiko eta pedagogiko honi uko egin gabe, fase politiko honetan boterea kokatu behar dugu erdigunean. **Nazio eraikuntza egitasmoen funtsa kontrabotere erreala sortzea eta mugen gainetik prozesu eratzaile nazional bat martxan jartzea izan behar da.**

Nazio eraikuntzaren logika, beraz, gaurko egunetik burujabetza gauzatzean datza; independentzia materialerako egitura ekonomiko eta politiko propioak eskuratzean. Abiarazi behar dugun herri prozesuan, Boterearen afera zentroan

kokatu behar dugu: komunitate batek bere erabakiak hartzeko eta gauzatzeko ahalmen politiko, sozial, ekonomiko eta kulturalaz hitz egin behar dugu.

Beraz, gazte mailan eskuratu beharreko botere-guneak logika horretan kokatu behar ditugu. Alegia, boterea eskuratzea proiektu politikoa gauzaten joateko ezinbesteko bitarteko gisa kokatu behar dugu, gure jardun politikoa transbertsalki zeharkatuko duena, norbanakotik kolektibora garatu beharrekoa.

Nolanahi ere, gazteria langilea subjektu gisa aintzat hartuz, beronen problematikaren eta zapalkuntzen bueltan eraikiko dugu boterea. Beraz, **prozesu eratzailearen baitan Gazte Boterea, gazteok gure bizitza ekonomiko, sozial, politiko eta kulturalaren gaineko erabakiak hartu eta bete ahal izateko gaitasuna izatea da**. Prozesu independentistari egin ahal diogun ekarpenik eraginkorra gazte problematikari aterabide bat emateko proposamen eta alternatiba errealak eskaintzea da; eraldaketa hau ezinbestean burujabetza prozesuari estuki lotuta egongo da.

Hau esanda, gaur gaurkoz, prozesu eratzailearen baitan Gazte Boterea eraikitzeke bi jardunbide nagusi identifikatzen ditugu:

Egungo sistema kapitalista patriarkalaren logika material eta ideologikoa errotik gainditu asmoz, honi paraleloki sortutako boteregune edo proiektuak. Gazte problematika gainditzeko asmoz, gazteok erabakiak hartu ahal izateko eta betearazteko paraleloki *de facto* **boterea sortzeko jardunbidea da**.

Gizarte antolamendurako **gaur egun dauden botereguneen baitan arrakalak eragin eta botere kuotak borrokatzea**. Zuzenean gure bizitzaren esparru bateko erabakiak gauzatu ahal izateko boterea eskuratzea baino, boteregune hegemonikoari gure aldarriak betearazteko baldintzak sortzean datza, gu geu botere hegemoniko bilakatuz.

Biek ala biek boterea lehiatzen dute, eta elkar uztartzen duten prozesuak dira. Are gehiago, bi prozesuek egungo marko politiko, ekonomiko, administratiboa higatu eta marko berri bat eraikitzen laguntzen digute, euskal gazteriaren erabakiak praktikan jarri eta errespetarazteko burujabetza eskuratzen goazen heinean. Gure izenean baina gurekin kontatu gabe hartzen dituzten erabakien bidegabekeria agerian utzi eta praktika desobedienteen eta botereguneen eraikuntzaren bidez boteretze-praktika berriak eraikiko ditugu. Horregatik, hain zuzen ere, zaharra suntsitu eta berria eraikitzen dugun bitartean, euskal gazteria langilearen borondatearen aurkakoak diren eta kontra jarduten duten botereguneak parez pare izango ditugu.

Boteretze-burujabetza prozesu honek, etorkizuneko euskal errepublikaren oinarria izango den herri boterea loratzen joatearekin batera, euskal gazteriaren beharrei erantzuteko bitartekoak eskuratzen diren heinean estatugintzari ere

ekarpena egiten dio. Hala, epe luzera, gure beharrei erantzun ahal izateko estatu egitura propioen beharra agerikoa izango da.

Eginkizun honek Gazte Boterearen eraikuntzan hartzen du forma. Gazte Boterea kontzeptu abstraktu bat izatetik harago, formulazio konkretua duen praxia da. Gazte Mugimenduek ematen diogu forma; eta Gazte Mugimenduak anitzak garen bezala, anitzak dira honen garapenerako formak. Baina gure potentzial iraultzailea zapalkuntza komunak identifikatzean eta sinergiak eraikitzean datza.

3.3.2 Txinaurri Lana eta lan filosofia

Ernaiko kide gisa, gure eginbeharra gazte espazioetan lanean aritzea da: gazte gisa gure bizitzen esparru guztietan zapaltzen gaituzte, eta honenbestez, gure praktika politikoa, gazte boterea, espazio horietan antolatze beharra dugu. Gazte Antolakundearen lan historikoa hori bera izan da: herri honetako gazteria antolakunde barnean sartzeari baino, edozein gazteri borroka espazio erakargarriak eskaintzea; guk geuk borroka guztiak aurrera ateratzea baino, elkarlanean oinarritutako dinamikak sortzea, beste gazte batzuekin borrokan aritzeko.

Ez goaz aurretik guztiz zehazturiko dinamikak eskaintzera, baizik eta harreman eta lan naturalaren bidez guztionak izango diren borroka piztera. Ernaiko kidegoaren lana Gazte Mugimenduetan egotea izan behar da, eta gazte mugimendurik ez dagoen lekuetan, berau sortzeko ahaleginak egitea. Beraz, dinamikoak izan behar gara gure planteamenduetan, harremanetarako gaitasunak hobetu beharko ditugu eta besteekiko errespetuan eta aitortzan oinarritzen diren praktika militanteak garatu beharko ditugu.

Esan bezala, harremanek berebiziko garrantzia dute eraldaketan: bestelako gazteekin harremanetzeko gaitasuna garatu eta gazte sektore anitzekin sinergiak sortu behar ditugu. Honetarako, ezinbestekoa da orojakiletasunaren ustezko jarrerak alboratzea, eta bestelako eredu batzuk garatzea. Enpatia, partaidetza, elkarlana, entzuteko gaitasuna, umiltasuna, eguneroko lana... hauek izan behar dira aurrerantzean landu beharreko gaitasunak, hauek izan behar dira Ernaiko kidegoa eta gure praktikaren oinarri.

Horregatik, Gazte Mugimenduei eraldaketarako subjektu bezala egiten diegun aitortzaz gain, Ernairen jarduna blaitu behar du kanpora begirako lan filosofiak. Gazte Antolakundearen ere gazteria ideologikoki formatzeko, gogoetak egiteko eta borrokatzeko esparruak eskaini behar ditugu.

3.3.3 Pedagogia independentista

Fase politiko honi zerumuga bat jarri diogu: Independentzia gauzatzeko aroa. Horregatik, aurrera eramaten dugun jardun ororen baitan eta esparru ezberdinetako burkideekin, independentzia materialerako borroka gain, ideologikoki ere independentziaren aldeko pedagogia egin behar dugu.

Independentziaren aldeko borondate anitzak eskuratu behar ditugu.

Aurreko fase politikoan egin bezala, egitasmo ezberdinen bidez mugak bilatu eta egungo markoa agortuta dagoela adierazi behar dugu. Horretarako, nazio mailatik bereziki, borroka ideologikorako praktika konkrituak garatuko ditugu. Horrez gain, funtsezkoa da agortutako markoa gaindituz eta behetik gora herri langilearen mesedetan erabaki burujabeak hartuz edota hartuaraziz gaurdanik estatu eraikuntzan urratsak egitea. [X.X Atalean ikusiko dugun bezala].

Pedagogia independentistaz ari garenean gazte mailan piztu beharreko lerro propioaz gain, gazteria dagoen esparru antolatu eta ez antolatuan egin beharreko lanaz ari gara. Gazte boterea eraikitze bidean egiten diren egitasmoen iparra edo tarteko estazio gisa proiektatu behar dugu euskal estatua. Burujabetza prozesuan sakontzeko bidelagunekin batera, egungo zapalkuntzak gainditzeko egitura propioen beharraz aritu beharko gara. Baita gure egunerokotasuneko jardunean gure inguru zabalarekin ere: lagunartean, klasean edo lanpostuan, gaztetxean... **independentziaren nahi eta beharra gazteriaren egunerokotasunean kokatu behar dugu.**

4. Iparrorratza

Bideorriak logika integrala du. Independentzia gauzatzea eta klase eta genero zapalkuntzak gainditzeko helburu duten garaipenak eskuratzeko, boteretu behar gara; horretarako, komunitatearen sorrera, inplikazio pertsonal-emozional-politiko berriak, kontrabotere guneak, gure bitarteko materialen jabe izatea... dira fase historiko honetarako lehengaiak.

Prozesu honek proiektu politikoan sakondu ahal izateko ezinbesteko bitartekoa den estatua beharrezkotzat jotzera eta eraikitzera eramango gaitu. Gazte problematikari alternatibak eskaintzen eta ideologikoki borrokatuz irekiko dugu independentziaren zerumuga berria.

4.1/ Gazte Mugimenduetako espresio ezberdinetatik eraginez

Gazte Boterearen eraikuntzan aurrerapausoak emango baditugu, azken urteetako salaketa plana gaitu eta Gazte Mugimenduetatik kontrabotere erreal bezala eratzea izan behar da lehenengo urratsa, ondoren botere baldintzatzaile gisa jardun ahal izateko. Horretarako, problematika konkretuei aurre egiteko hamaika formatako alternatiba konkrituak garatuko ditugu.

Baldintza ezberdinetara egokitu beharreko prozesu dinamikoa da, beraz; leku guztietan baldintzak sortu behar ditugu lehenik **maila lokaleko alternatiben sorrera** gauzatzeko. Herri bakoitzari dagokio aurrera begirako bidea marraztea eta bere mugarri eta inflexio puntu propioak garatzea. Dagoeneko baldintza egokiak dauden eremuetan alternatiba hauek gauzatzeari ekingo diogu, inoren zain egon gabe. Herriz herri olatu bat sortuko badugu, gu geu izango gara horren motore.

Baina alternatiba lokalak sortzearekin ez da aski izango. Urrats garrantzitsu bat ematera goazen arren, gure bizitzen jabe izatetik urrun gaude, eta beraz, alternatiben eraikuntzari dagokion prozesuan urrats asko ditugu emateko. Zentzu horretan, Gazte Mugimenduetan ikuspuntu integral eta kolektibo baten bueltan hausnartzen eta sinergiak garatzen jarraitu beharko dugu. Bide horretatik, **ildo ezberdinek eztabaidak ematen jarraitzea** da gaur gaurkoz eskaintzarik hoberena.

Aurrerapauso nabarmenak eman dira azkenaldian zentzu honetan. Eraikuntza lanetan jarraitzen duen gazte mugimenduen espresio berriak jaio dira eta jaiotzeaz daude, eta alternatiba gu geu garela barneratuta duten espresioak indarra hartuz doaz. Gazte Mugimenduetan ematen ari den indar olatu berriari gure ekarpena egiteak berebiziko garrantzia izango du datozen urteotan

Horrela, sektorialki garatutako borrokek boterea gauzatzeko dimentsio ezberdinak aintzat hartu behar dituzte. Alegia, **boterea eremu sinboliko, politiko, kultural, linguistiko, ekonomoniko, ideologiko, instituzionalean... garatu beharko dugu**. Botere adierazpen hauek, abstrakzioak gaindituz, elementu konkretuen bidez garatzen dira, hala nola: gazte sorkuntza artistiko zein intelektualaren bidez, gazte espazioen autogestioaren bidez, produkzio eta kontsumo sare propioen bidez, espazio feministen bidez, hizkuntza arnasguneen bidez, gazte komunikazio eta errelato propio baten bidez...

Horregatik, boteretze prozesua jarduera materialaz ez ezik ideologikoki ere jantzi behar dugu, **Gazte Boterearen eraikuntzaren inguruan gogoeta kolektiboa eginez eta plazaratutako praktika burujabeen inguruan hausnarketa jarraikorra eginez**. Izan ere, lehengo urratsak zehaztu ditugun arren, **paradigma berriaren gauzapenetik, plazaratutako eruedetan sakontzeko bidea** marraztu beharko dugu datozen urteetan.

Sakontze ariketa horretan, **gazteen emantzipazio prozesuan eragiten kapitalaren eta bizitzaren arteko kontraesan antagonikoak adierazten dituzten problematikek zentralitatea eskuratu beharko dute**. Gure apustua, ikuspegi feminista batetik etxebizitza, lana, hezkuntza eta harreman ereduak garatzea izango da. Zergatik? Eremu hauek bizitzaren eta gizartearen birproduktzioarako eremu zentralak direlako, eta denak merkatu kapitalistak bereganatu dituelako.

Instituziogintza herrigileak eremu honetan paper garrantzitsua izango du. Ezker soberanistak botere politikoa eskuratu eta instituzioen kudeaketa bereganatu duen tokietan gaurdanik martxan jartzen diren gazte eta herri egitasmoak sustengatzean eta suspertzean dugu erronka. Hau da, gazte esparru eta esperientzia autogestionatuei aitortza emanaz eta bestelako herrigintza egitasmoekin batera legitimitatea eta aitortza politikoa lortuz. Botere instituzionalaren baitan eman daitezkeen indar korrelazioak eta agerian geratu daitezkeen kontraesanak aintzat hartu beharko ditugu.

Gazte Boterea eraikitzeke borrokan, arestian aipaturiko bi logika uztartu beharko ditugu: proiektu alternatiboen eraikuntza eta aldarrikapen zehatzen inguruko ekimenak. Borroka desberdinek bi logika hauen adierazpen berezituak izan ditzakete, ala adierazpen berberak biak barnebidu. Esaterako, etxebizitza ildoan, martxan jarritako proiektu desberdinak eta eskubidearen inguruko borrokek egon daitezke, harremanetan ala ez. Biek elikatzen dute borroka. Era berean, bi borroka-moldeak barnebiltzen dituzten espazio edo eragileak ere egon daitezke.

4.1.1 Proiektu alternatiboen funtzio estrategikoak

Autoeraketa komunitarioa oinarri duten proiektuak izanda, komunitatea eraikitzea da haien oinarri nagusia, eta autogestioaren bidez inposatutako markoari desobeditzea da muinean duten praktika. Bizi eredu berriak gaurdanik eraikitzen ditu, gazteria bestelako balore eta praktiketan murgilduz. Gaztetxeak, etxebizitza okupatuak, zaintza sareak, ekonomia sozial eta eraldatzailearen baitako proiektu batzuk... dira honen adibide.

Gaur gaurkoz, eremu honek ibilbide mugatua izan du, baina datozen urteetan bultzatu beharreko eremua da. Zergatik? Komunitatea saretu eta auto-determinazio joera hartzera bultzatzen duelako gazteria. Inoren esperoan egon gabe, praktika burujabeak gauzatzean datzalako. Sarritan hedatu den kritikaren aurka, praktika hauek atomizazioa eta endogamia ekidin eta kolektiboki ekiteko bitarteko zabalak izatea bultzatu behar dugu.

Nolanahi ere, autoeraketa prozesu metakor hauen bidez boteretze prozesua azken bururaino eramatean dago gakoa. Gisa honetako alternatibak langile herriaren emantzipaziorako zein bizi baldintzen hobekuntzarako bitarteko bat dira, bere horretan herri boterearen ernamuina delarik gisa honetako edozein esperientzia autonomo. Maiz, alternatibak boluntarismo sozialdemokrata edo burges-txiki batetik epaitzera jo izan diren arren, esan bezala Euskal Langile Herriaren tresna gisa kokatzen dugu guk alternatiben eraikuntza, eremu guztietan boterea lehiatzera eta honen kontzientzia sortzera baikaramatza. Horrenbestez, gazte langileon behar kolektiboak asetzeko politizazio prozesuan modu hedakor batean jarduteko ikuspegitik abiatzen gara.

4.1.2 Aldarrikapen mugimenduen funtzio estrategikoak

Gazte Mugimenduetan bestelako antolakuntza adierazpen eta praktika politikoen baitan lan egiten duten mugimenduak ere badira. Halako mugimenduek inposatutako markoaren bueltan aldaketak planteatzen dituzte, eta horrenbestez, bizi baldintzak borrokatzen dihardute. Hala, sistemari kritika orokorra egiten diote, posizio ezberdinak higatuz eta garaipen txikiak lortuz, botere hegemonikoari botere kuota ezberdinak borrokatuz. Honen adibide dira etxebizitza parke publikoaren edo alokairu sozialaren aldeko borrokek, mugikortasuna errazteko gazte txartelarenak, LOMCE eta bestelako inposaketen kontrako borrokek, abortuaren aldekoak...

Botere kuota ezberdinak lehiatzeko, proposamen politiko zehatzak osatu behar dira. Sistemaren kritika orokorra egitea, borroka ideologikoan lagundu dezakeen

arren, ez da nahikoa botere politiko eta ekonomikoa lehiatzeko. Garaipen zehatzek aldarrikapen zehatzak behar dituzte. Akats horretan erori gara maiz, proposamen argiak egiten ez zituzten diskurtso zabalegiak egin ditugu. Kontrakotasunetik eraikuntzara salto egitea ahalbidetuko duten eskaintzak behar dira horretarako.

Hala ere, militantzia forma ezberdinak biltzeko ahalmena adierazten dute eta horrenbestez, herri aktibaziorako eta borroka ideologikorako erabat baliagarriak dira. Hala, eremu honek bere pisua du, erraztu baitezake gazteriaren sektore ezberdinetara iristea eta Euskal Herriak prozesu independentista eraldatzailean aurrera egiteko beharrezkoa duen iraultza demokratikorako politizazio prozesu orokorrean laguntzea. Honek ez du esan nahi egitasmo hauek funtzio instrumentala dutenik, bere baitan eraldatu beharreko markoari botere kuotak irabaztea eraikuntzan jardutea baita. Modu berean, hegemonia zuzenean lehiatzen dutenez gero, bertan kokatzen den botere hegemonikoa ahuldu eta mugiarazi egiten dute.

4.2/ Aldarri independentistarako tresna berriak

Hautabide independentistaren logikan mugimendu independentista sendo, anitz eta indartsua osatzera goazen heinean, gazte mailatik ere independentzia hautatzeko bide anitzak ireki behar ditugu.

Bide horretan, alde aurretik definitutako lan lerroez gain, independentismoaren hedapenerako lehengo pausua **dagoeneko hautu independentista egina duen gazteria independentista aktibatzea** izan behar da. Sortu nahi dugun olatu independentista hauspotzeko baldintzak sortu behar ditugu, betiere kontuan izanda eremu honen agenda mugimendu independentista zabalak garatuko duela eta bertan gure ekarpena ezinbestekoa izango dela.

Nolanahi ere, hasi berri dugun fase politikoan gazte izatea independentismoarekin lotzea lortu nahi dugu. Jendartean “gaztea naiz, independentista naiz” baieztapenak zentzua hartzea, alegia. Logika horretan, 4 urteko ziklo politiko honetan **gazte identitate independentista** sortzeko erronka izango dugu esku artean. Identitate horrek osagai apurtzaile eta aurrerakoiak izan behar ditu, atzera begira baino aurrera begira dagoena, soilik argudiatze historikoetan oinarritu baino etorkizun berri bat osatzeko aukerez mintzatuko dena.

Identitate bat eraiki beharrak ez du estatu propio baten aldeko arrazoiketa albo batera uzten, inolaz ere. Izan ere, estatu propio baten aldeko argudioak zabaldu eta iritzia sortu nahi dugu; baina independentismoa hegemoniko bilakatu behar badugu, iritziez harago jarreretan eragin behar dugu. Alegia, iritzia aldakorra eta unean unekoa izan daitekeen bezala, jarrerak jokabideak egituratzen ditu koiunturatik haratagoko logikan. Zentzu horretan identitatea abiapuntuzko ezaugarri esentzialista bat izatetik, dinamikoki eraikitzen joan behar den ezaugarria da.

Horregatik, hainbat ezaugarri bildu beharko dituen mugimendu independentista berriak, aktibatutako gazte independentistak hiru ardatzetako lanketa dinamikoa garatu beharko luke bere jardunean:

Nahia. Independentzia desira bilakatu behar da, herri eta gazte bezala nahi dugulako. Proiektu politiko gisa gure hautua delako, aukera berriak marrazten dituelako...

Beharra. Gazteok hobeki bizitzeko behar dugulako, herri gisa garatzeko estatu egiturak behar ditugulako, demokrazian sakontzeko beharrezkoa delako, euskararen normalizaziorako ezinbesteko osagai delako... Finean, estatu egiturak lortu ezean iraultza eta eraldaketa nahi oro zapuztua geratuko delako bi estatuen eskuetan. Burujabetza osoa eskuratzeko ezinbesteko tresna da Estatua.

Ahalera. Egingarri den egitasmoa delako. Nazioarteko esperientziak gurera ekarri, identitate horri ekarpena egin ahal diolako. Herrialde Katalanetan Printzipatuko prozesu soberanista gertuko lekukoa da, zalantza gabe.

Lan lerro honen ezaugarri eta irismen nahiengatik, **Gazte Antolakundeak eginkizun hau bere eremu soziopolitikotik haratago dagoen gazteriarekin elkarlanean diseinatu eta garatu beharrekoa dela deritzo.** Gure ustez, Ernai gainditzen duten **tresna berrien beharra** dugu, gazteen artean independentismoa erakargarri bilakatuko dutena eta independentismoaren alde egiteko aukerak irekiko dituen.

Nolanahi ere, prozesu independentista herri prozesu bat izan dadin, tresna berri hauek jardunbide dinamikoa eta parte hartzeko aukera zabalak izan beharko dituzte, logika burokratiko eta alderdikoia ekidinez. Horregatik, tresna hauen artean, gaur gaurkoz alderdi edo gazte mailako antolakundeen topaguneak bezalako formak ezin ditugu lehenetsi. **Norbanako ez antolatuei baina independentismoaren alde egin nahi dutenei lan egiteko aukerak eskaini behar zaizkie.**

Garatu beharreko tresna berri hauek, egungo fase politikoari erantzunez, **logika deszentralizatu** jarraitu beharko luketela uste dugu. Lurralde lurralde eta herrialdez herrialde moldatu beharko du jarduna dagokion errealitateari erantzunez. Jardun diskurtsiboa testuinguru politikora egokitu beharko da. Parte hartzeko ereduari dagokionez ere, lekuan lekuko errealitatera egokitu beharko litzake, guztiz moldagarriak eta epe laburreko erronken arabera.

4.3/ Ernairen ekintza politiko propioa

Aipatutako eginkizunez gain, Ernairen erreferentziapen ideologikoki eragiteko eta proiektu politikoa lantzeko beharra dugu. Eraikuntza egitasmoari zuzendutako pedagogia independentista garatu behar dugun bezala, independentismoari pedagogia iraultzailea esleitu behar diogu. Horretarako funtzio estrategiko bat dugu: bi mugimenduen parte garen heinean, gazte mugimenduen eta mugimendu independentistaren arteko giltzarria izatea.

4.3.1 Eskaintza soziala independentismoaren abiapunturako

Pedagogia independentista egin ahal izateko Ernaitik garatutako egitasmo nazionalak egungo markoaren agorpena azaleratzea eta honen mugak aurkitzea izango da. Horretarako, Euskal Herriaren eta gazteon zapalkuntzaren erantzuleak salatu ez ezik, Gazte Mugimenduen apustuekin bat egingo duten boterea lehiazteko planteamenduak ere garatuko ditu.

Pedagogia independentistak dinamika eta borroka konkretuetan zehaztapena behar du. Jardun horren gakoa egungo markoaren muga edo topeak azalerazi eta horiek politikoki errentagarri bilakatzea izango da, errelato independentista osatuz eta gazte sektore berriak independentismora erakarrit. Erabateko paper instrumentala ekiditeko, lerro honen garapenak Euskal Estatuaren oinarriak zehazteko zein egungo burujabetza prozesua azkartzeko duen papera aitortu behar diogu.

Horretarako, inposatutako markoaren gainean eraldaketak azken bururaino eramateko borrokatuko gara. Neurri zehatz hauen gauzapenarekin eta hauen inguruan abiarazten diren borrokekin inposatutako markoari botere kuotak irabaztea xedea den bezala, bide honen mugak mahaigaineratuko dira. Zehatzago, abstrakzioetan erortzea ekiditeko, Ernaik bizi baldintzen eta soziokonomiaren inguruan hainbat aldarrien gainean independentziaren beharra azaleratuko dugu. Garatu beharreko eginkizun honen bueltan, Ernaik larrialdi plan bezala jardungo duen eduki sozial minimo bat jorratuko du, aldarri erabat taktikoekin; baina Gazte Mugimenduaren agenda propioarekin sintonian joango direnak.

Egitasmo honek, datozen urteetan aurreikusi ditzakegun erasoaldi neoliberal berriei marko propio baten beharrekin erantzuteko ahalmena eman diezaguke, erreformen ezezkotasun batean kokatuzetik haratago.

Modu berean, aipatutako klabeetan egunerokoari erantzuteko gaitasuna handitzeko mekanismoak ezarriko ditugu. Egungo topeak azalarazteaz gain, koiunturak sortutako baldintzak baliatzea ere ezinbestekoa izango zaigu proiektu politikoaren aldeko borroka ideologikoan sakontzeko.

4.3.2 Garapen komunikatiboa eraginkortu

Arestian aipatutako atala borroka ideologikorako bitartekorik eraginkorrena izango da. Hala ere, eskaintza taktikoez gain eta honen inguruko kokapen ideologiko eta estrategikoez gain, **proiektu politikoaren lanketan sakondu eta edukiz bete** behar dugu. Honek behar beste arrakasta izan dezan, gure diskurtsoa osatzeko **gaitasun ideologikoan sakondu** eta hau helarazteko **gaitasun komunikatiboa eraginkortu** behar dugu.

Gazteok iruditegi propio baten beharra dugun bezala gazte antolakundeak iruditegi berritu baten beharra du. Honek ez du esan nahi orain arteko guztia ezabatu eta ahortzi behar denik, inolaz ere, baina gure erreferentzia propio berrituak garatu behar ditugu. Garena eta izan nahi dugunaren arteko sokan

mantenduz topatu behar dugu oreka. Hau ez da egun batetik bestera egiten, kontraesanak gaindituz garatzen den prozesua da. Hala ere, aldaketak emateko ezinbestekoa da aukera eta eskaintza berrietarako prest egotea. Jarrera eraikitzaile eta ireki batetik garatu behar dugu.

Borrokaren inguruan sortutako iruditegia gure ispilua da. Transmittitu nahi duguna izan behar gara, sinesten dugunaren erakusleihu. Borrokarako grina kutsatu behar dugu eta egiten duguna lau haizetara zabaldu. Aldaketa estetikoekin erroko kontuak aldatuko ez diren arren, egungo gazteria erradikalaren praktika berriari atxikitutako iruditegia birsortzea ezinbestekoa da: apurtzailea izatea, eztabaidak sortzea.

Borrokak piztea bezain garrantzitsua da geure borrokek guk geuk kontatzea. Protagonistak izatetik harago, **oraina idazteko ardura hartu** behar dugu. Horretarako ezinbestean argi izan behar dugu denok militante komunikatiboak garela. Egiten dugun ororekin komunikatzen dugu. Kanean kartelak jartzen ditugunean komunikatzen ari gara, baita ekimenak egitean ere. Militante komunikatibo izanik, **hartzaileak ongi identifikatu eta ezagutu behar ditugu**, eta beraiengana heltzeko kanal berri eta eraginkorrenak probestu. Honek guztiak aurretiazko lanketa eskatzen du.

Azkenaldian tresna berriak agertzeak izugarri eraldatu du politika. Deklarazioak tweet bidez egitetik harago, gure harremantzeko moduak ere erabat aldatu dira. Eta zurrumbilo horretan gabiltza militanteok ere.

Hala ere, gure txinaurri lana gazteekin batera egin behar dugu eta horrek gazteekin egon, eztabaidatu eta hausnartzea esan nahi du. **Aurrez aurreko jardun politikoa izan behar da ardatza**. Espazio komunak probestu behar ditugu baina gure espazioak ez diren lekuetan lan egiten ere ikasi behar dugu, lekuan leku lortu nahi duguna argi izanik. Horrez gain, kanean mezu politikoa erdigunean jarri behar dugu. Kanean komunikatzeko marketing gerrillan sakondu behar dugu, komunikazio gerrillak antolatu.

Aurrez aurrekoetatik harago komunitateen eraikuntza saretik ere egin dezakegu. Gazteon kontsumo joerak aztertu behar ditugu eta bertan parte hartu. Komunitateak sortu, eta politikaz hitz egin naturaltasun osoz. Elkarrizketa bi norabidetakoa behar da izan, ezin dugu kartel eta bideo bonbardaketa konstante bat bakarrik egin. Zentzu horretan azpimarratu behar ditugu gazteok eskura ditugun gure komunikabide propioek betetzen duten paper garrantzitsua.

Gazte proiektu komunikatiboetatik harago, gainontzeko komunikabideak ere borroka esparru bezala ulertzen ditugu. Bakoitzak eskaini ditzakeen aukera eta arriskuak aztertu eta gero erabakita, nola ez. Zenbat eta leku gehiagotatik gure mezua zabaldu, eragina ere zabalagoa izango da.

5. Gatazkaren ondorioak

Euskal Herriak agertoki berria bizi du Euskadi Ta Askatasuna erakundeak borroka armatua behin betiko utzi zuela iragarri zuenetik. Aieteko konferentziaren ebazpena oinarri hartuta, euskal eragile politiko, sindikatu eta eragile sozialak eskutik gatazkaren ondorioei aterabide ordenatu bat bilatzeko bidea hasi zen. Tartean, presoan etxeratzea, desmilitarizazioa, biktimen erreparazioa zein memoriaren lanketa jarri ziren jorratu beharreko ardatz gisa.

Ordea, espainiar zein frantziar estatuek lehen unetik ulertu dute irtenbide demokratikoak prozesu independentistan urratsak ematea ekarriko zuela, eta konponbiderako aukerak zapuztu nahian jokatu dute, behin eta berriz bi estatuen izaera antidemokratikoa agerian utziz. Gatazkaren ondorioen konponbide bidean jarrita gatazkaren erroaren beldur hasieran eta garaile eta garaituen errelatoa inposatzeko asmoz gerora, bake agertokia oztopatu nahian ibili dira. Horrela uler ditzakegu memoriari lotutako polizia operazioak edota Guardia Zibilak Euskal Herrian izandako papera zuritzea bilatzen zutenak.

Beraz, estatuen blokeoak ezinbestean prozesu independentista eraldatzailea marko ez demokratiko batean garatzera garamatza; hots, Euskal Herriaren eta erabakitze eskubidearen aitortza ez ezik, eskubide zibil eta politikoak eta proiektu politiko guztien bideragarritasuna ukatuak dira espainiar eta frantses estatuen baitan. Horregatik, gatazka politikoaren eta errepresio bideen forma berriak aintzat hartu beharko ditugu.

Aietetik eta gaurdainoko bilakaera euskal jendartearen konponbiderako nahiaren eta estatu espainiarraren jarrera inobilista eta oztopatzailearen arteko talkan ulertu daiteke. Alde batean, euskal jendartea izan da; konponbidearen aldeko jarrera aktiboa izan duena, presoan eskubideen alde agertu dena, biktima guztien erreparazioa bilatu duena. Bestean, estatuak; ETA erakundearen armagabetearen aurkako polizia operazioak eginez, euskal presoan asistentzia juridiko eta ekonomiko kolpatuz zein nazioarteko bitartekarien lanari oztopoak jarritz.

Euskal Herrian sortu behar ditugu baldintzak, aurreko ziklo politikoko gatazkaren ondorioak konponbide bidean jarriko badira, euskal herritarren gehiengoaren bultzadaz izango baita. Berebiziko garrantzia hartuko du euskal gazteria konponbidearen lerroan inplikatzek. Gure ardura da gazteriaren artean gatazkaren ondoriorik gabeko agertokiaren aldekotasuna zabaltzea, historikoki amnistiaren erreferentziaz izendatua.

Konponbidearen lerroak orokorrean egin bezala, lerroak berak gazte mailan gaurkotze ariketa bat behar du. Izan ere, ezin diogu ezikusiarrena egin egungo egitate bati: egun euskal gazteriaren gehiengo batek ez du gatazka politikoa borroka armatuaren terminoetan bizi izan. Horrek ondorio nabarmenak ditu gatazkaren ondorioen kokapenean zein aurreko ziklo politikoaren ulerkeran, baita Gazte Antolakundeak gatazkaren ondorioen lerroari egin beharreko ekarpenetan ere.

Beraz, Gazte Antolakundeak berebiziko ardura du gatazkaren ondorioen lanketan; baina horrek ez du esan nahi Ernaik propioki garatu beharko dituenik eremu honekiko lanketa guztiak. Noiz gure erreferentziapen lan egin eta noiz bestelako dinamikak hauspotu hausnartu beharko dugu modu jarraikor batean.

5.1/ Euskal preso eta iheslari politikoen aldeko gazte ekarpena

Ilido honi dagokionean, nagusi diren beste jendarte eragileek markatzen dituzte denborak eta bideak. Gazte Antolakunde gisa, gure eginbeharra Ezker Abertzaleak markatutako agendarekiko eta urratsekiko osagarri gisa lan egitea dagokigu.

Zentzu horretan, Gazte Antolakundeko kideok bi bide ditugu arlo honetan ekarpena egiteko. Batetik, Sorturen eta bestelako dinamikien baitan gure ekarpena eginez. Bestetik, Ernai gisa plazaratu ditzakegun dinamikien bidez. Beraz, dinamika propioari pisua kendu eta Ezker Abertzaleak berak bultzatutako ekimen eta dinamiketan jarriko dugu indarra.

Agenda politikoan egon daitezkeen aferez gain, gazteok euskal preso politikoen eta euskal iheslari politikoen kolektiboetako kideekin dugun harremana sakondu behar dugu. Lehenik, EPPKri eta EIPKri dagokien eta beharrezkoa duten aitortza eta babesa eman. Bigarrenik, bi kolektibo hauetako kide eta senideekin harreman zuzena estutuz. Gure artean ez direnek Gazte Antolakundearen jardunaren eta bere kidegoaren berri izan behar dute. Gazte belaunaldi berriek espexetako eta erbesteko errealitatea ezagutu behar dute. Horretarako, gazteon konpromisoan sakondu eta Gazte Antolakundearen lanabesa doitu beharko dugu.

5.2/ Memoria: Gazte errelatoa

Igaro dugun konfrontazio fasearen inguruan errelatoen arteko talka ematen ari da gure artean. Aurrerantzean, pisu berezia hartuko du gai honek. Horregatik, errelato orokorrean eragiteaz gain, gazteok aurreko borroka zikloaren eta bere ondorioen inguruan gure errelatoa plazaratzeak berebiziko garrantzia du.

Belaunaldien arteko kontakizunaren haria mantendu behar dugu. Aurrera eramandako borrokaren ezagutzan zentratu ez ezik, formazio politikoak lekua eduki behar du, ezagutza aplikatu eta gure ondorio propioak eskuratu ahal izateko.

Gazte errelatoak hainbat alderdi jorratu behar ditu. Gatazkaren ondorioak gazteon artean nola bizi izan ditugun aditzera eman ez ezik, borrokan izan dugun paper erabakigarria mahaigaineratu behar dugu. Atzera begira geratu ordez, aurrera begirako norabidea marrazten lagunduko digun errelatoa behar dugu.

5.3/ Indar okupatzaileen irteera

Eremu honek gazte maila gainditzen du. Sarritan indar okupatzaileen presentzia eta harrokeria pairatzen gazteok lehenak garen arren, eremu honen lanketak zein ezaugarritzeak gazte antolakuntza gainditu behar du. Zentzu horretan, indar

okupatzaileen jazarpena biziki pairatzen duten herriek dinamikak abian dituzte. Gure eginkizuna, lehenasunezkoa ez bada ere, eremu hauek babestea eta osagarritzea da.

Desmilitarizazioari atxiki behar diogun erronka, memorian eragiteaz gain, prozesu independentistarekin lotzea izan behar da. Ildo honi antolakunde gisan egingo zaion ekarpen nazionala momentu puntualetara mugatuko da.

5.4/ Jazarpena

Aipatu bezala, Ezker Abertzaleak estrategia aldaketa eman arren, marko ez demokratiko batean borrokatzeak jazarpen mota berriak ekarriko ditu. Egungo fase politikoan, gatazka soziala herrian barrena ugarituko den heinean, errepresio formak ez ezik, errepresaliatutako kideen ezaugarriak ere aniztuko dira. Hainbat dira agertoki berri honetan birkokatu beharreko elementuak. Beraz, fase politiko berrira berregokitu beharko dugu ildo honen garapena. Herri gisa eta herri prozesuaren logikari jarraituz egingo dugu gainera, bidelagun izango ditugun sektoreekin.

Bestalde, errepresioa borroka errelatoan birkokatu beharra daukagu. Kolore guztietako indar errepresiboek jokutzen duten papera mahaigaineratu behar dugu.

6. Hezkuntza ildo eta heziguneak

2013an, Ernainen sorrerarekin eta Ikasle Abertzaleak-en VI.en kongresuarekin batera, hainbat erabaki ebatzi genituen hezkuntza ildoari eta heziguneen eremuari dagokionean. Ikasle Abertzaleak Ikasle Antolakundeak *hezkuntza ildoaren eta ildo koiunturalaren* lanketa eta dinamizazioa bere gain hartu zuen heinean, Ernai gazte antolakundean Ikasle Estrategia gure egin genuen, bi antolakundeok Gazte Estrategiaren parte kokatzen baikenuen berau. Antolakuntzari dagokionean, Ikasle Abertzaleak izan da ikastetxe eta unibertsitateetan antolatutako egitura bakarra.

Erabaki hauek hezkuntza eremuan beste edozein lanketa politikoaren gainetik ikasle problematikak pisua hartzea eta bi antolakunde dinamizatzaileen arteko katramilatzeak ekiditea zuten helburu. Egun ditugun hutsuneei begira, iraganeko akatsetatik ikasiz, egokitzapenak egitea dagokigu.

Modu berean, Ezker Abertzalearen strategiari eta funtzioei erantzuteko ezintasunak topatu ditugu. Alde batetik, Ezker Abertzaleak hezkuntza estrategia integral bat garatzeko ezintasunak topatu ditu; baina bestetik, hezkuntza problematikatik harago heziguneak eragiteko esparru hartuta, dinamika eta lanketa ezberdinak egiteko eta estrategikoki kokatzeko ezintasunarekin ere topatu gara.

Ikasle eta gazte antolakundeok Ikasle Estrategia Gazte Estrategiaren baitan

kokatzen dugun arren, Ikasle Estrategia Gazte Estrategian definitutako oinarri estrategikoen bueltan diseinatua izan dadin bitartekoak birpentsatu behar ditugu.

Antolakuntza eredia modu dinamikoan moldatzen joan garen arren, ez da asmatu bi antolakundeen arteko hartu emana modu eraginkorrean garatzen. Eztabaida estrategikoetarako espazioen falta nabaria izan da bi antolakundeen arteko harremanean. Marko konpartitu gehienak koordinazio eta gestio markoak izan dira.

Gaur gaurkoz, oro har Gazte Antolakundeko kidegoak hezkuntza planteamendua eta plangintza ezagutzen ez duela zintzoki baieztatu dezakegu, ez dugu estrategikoki kokatzen eta ikaslearen problematika ez da heziguneetatik kanpo islatzen. Horregatik, Ikasle eta Gazte Estrategiak indartuta ateratzea da eztabaida honen helburua, esparru bakoitzak dituen berezitasunak errespetatuz baina estrategia bateratuak diseinatzeko gaitasun eta markoak garatuz.

6.1/ Hezkuntza ildoan eman beharreko hausnarketa estrategikoak

Ikasle Estrategia garatu eta diseinatzea Ikasle Abertzaleak antolakundearen esku geratuko da; Gazte Antolakundeak Ikasle Estrategia bere egingo du eta ikasle antolakundeak Gazte Estrategia aintzat hartuko du.

Zentzu horretan, nazio eraikuntzari ekarpena egin asmoz hezkuntza ildo – Ekin Euskal Eskola Nazionalari – Ikasle Abertzaleak-en ildo estrategiko nagusia da; horrenbestez, gaurdanik Euskal Eskola Nazionala eraikitzearen filosofia du oinarri.

Bost lan lerro transbertsalen bueltan ematen da ildoak: **euskalduntzea, parte hartzea, ikas baldintza duinak, pedagogia askatzailea eta eduki propioak.**

Bost ardatz estrategikoak Euskal Eskola Nazionala irudikatzen eta egikaritzeko planteamendu zehatzen bueltan antzeman ditzakegu.

Ertainetan ildo hau autodefentsaren perspektibatik garatuko dugu, egungo zapalkuntzei aurre egin eta eraso ororen aurrean talka sortuz. Erresistentzia terminoetatik gaindi aritzeko, **elkarlaguntza sareak** sortzea eta mekanismoak martxan jartzea dagokigu. Eredu honetan Euskal Eskola Nazionalaren isla **herri eskolen bueltan** ematen direnak liriateke.

Unibertsitateetan eduki propioak lortzeko dinamika nagusiak **Eskola Kolektibo, Eztabaida Talde edota Herri Unibertsitateak** dira. Tokian toki dinamika ezberdinak sustatzeko apustua argia da.

Ikasle Abertzaleak-en plangintzen eta eztabaida estrategikoen baitan garatu beharko dira aipatutako elementu estrategikoak. Ernaitik Gazte Antolakunde gisa hezkuntza eta ikasle problematika proiektu politikoaren baitan nola txertatzen dugun argituko dugu datozen urteetan.

ERTAINAK

Gure lehen militantzia zikloa ertainetan ematea oso garrantzitsua da. Beraz, egungo argazkia ikusita, **Ertainetan Ikasle Abertzaleak-eko taldeak indartzea** izango da gure erronka.

Esparru eta militantzia ziklo honek dituen ezaugarriak direla eta, egiten diren **lanketak ulerterrazak** izan behar dira. **Borroka lokalak sortzeaz gain, tentsionamendu nazionala sortzeko esparrua dira.** Bere potentzialtasun guztia garatu ahal izateko tresna egokiak eskaini beharko dira.

Maila lokalean koordinazio markoak eratzea eta/edo indartzea ezinbestekoa da, bi antolakundeen arteko harremana indartzeko, ikuspuntuak konpartitzeko eta lanketa bateratuak egiteko; funtzioak ondo bereizten dituen marko metodologiko egoki bat sortzea ezinbestekoa izango da mahai horiek egoki funtziona dezaten.

Ikasle Abertzaleak-en egituraren hutsuneak medio, maila lokaleko hainbat eremutara bitartekoak ez dira iristen. Beraz, **Ernaiko egituraren eta herrien ardura izango da ahal den heinean hutsune hau konpontzen laguntzea, behar den kasuetan Gazte Antolakundearen egitura erabiliz.** Funtzio hau soilik ikasle antolakundearen egituraren hutsunea dagoenean beteko du Ernaik.

Antolakunde bakoitzak duen izaera eta osaketa kontuan hartuz, **Ikasle Abertzaleak-eko taldeek autonomia mantentzea ziurtatuko da**, batez ere infantilizazioa ekiditeko.

UNIBERTSITATEAK

Lehentasuna ikasle problematika izanik, eremu honetan ere Ekin Euskal Eskola Nazionala ildoaren garapenak du garrantzi handiena. Nazio Eraikuntza ikuspunturik garatzen diren proiektu zehatzen bueltan egiten du apustua Ikasle Abertzaleak-ek. Gaur gaurkoz, Herri Unibertsitateak, Eskola Kolektiboak, Talde Kritikoak dira garatzen ari diren proiektu nagusiak.

Proiektu hauek, Euskal Eskola Nazionala irudikatzen laguntzeaz gain, ekarpena egiten diote Gazte Estrategiari. **Ikasle Abertzaleak-i dagokio eremu hauek hauspotzea eta lehentasunezko proiektu hauek indartzea.** Ikasle eta Gazte Estrategiei mesede egiten dietela kontuan izanik, bi antolakundeek nazio eraikuntzako perspektibak konpartitzea ezinbesteko ariketa da.

Erronka nagusia **Ernaiko militanteok heziguneak eta hezkuntza problematika borrokarako esparru aktibo gisa kokatzea** da.

LANBIDE HEZIKETAK

Ikuspuntu sozioekonomikotik bultzatuko ditugu borroak; dinamika orok hezkuntza eta ikasle ikuspuntua jaso beharko du. **Eremu honetako eztabaida estrategikoak bi antolakundeek egingo ditugu.**

Eremu honen estrategikotasuna ikusirik, epe ertainean langile izaera iraultzailea lantzearen alde, aktibatu beharreko borroka nagusiki lan eskubideen defentsan zentratuko dira.

Gainerako eremuetan alternatibean eraikuntza prozesuari erantzuteko eremu honetatik zein tresna eta aukera ditugun aztertu beharko dugu.

6.2/ Antolaketa eta funtzionamendu irizpideak

Eremuz eremu ondorengo antolaketa eredia garatuko dugu:

Ertainetako heziguneak

Antolaketa eredia tokian tokiko baldintzetara egokitu beharrekoa den arren, hainbat izango dira oinarrizko irizpideak. **Ikasle Abertzaleak eta Ernaiko kideen artean harremanak indartzeko**, tokiko aukeretara egokitzen diren antolakuntza planteamenduak egingo ditugu.

Aldebikoez gain, herri/auzoetako Ernaiko taldeetan ikastetxeetako Ikasle Abertzaleak-eko kide bat gutxienez egotea bermatuko da. Kide honek ikastetxeko koordinazio markoan parte hartuko du, bertako planteamenduek argazki osatua izan dezaten. Ikastetxean ikasten duen inor ez egotekotan, ikastetxeko militantzia zikloa ahalik eta gertuen duen kideak bere gain hartu beharko du ikastetxearekin harremana estutzea eta beharrak konpartitzea. Harreman hauek etorkizuneko militantzian positiboki eragiteaz haratago, ikasle eta gazte problematikaren arteko uztarketa egiteko baliatuko dugu.

Ikasle Abertzaleak-eko kideak politikoki elikatzeko, koiunturari erantzuteko eta herri dinamiken berri emateko ardura gurea izango da. Ikasle dinamiken inguruan proposamen eta analisiak konpartituko dira, baina botere harremanak lausotuz eta autoritarismoan erori gabe. Finean, heziguneetako planteamenduak Ikasle Abertzaleak-en markoetatik garatu behar direla kontuan izan behar dugu; autonomia zainduz. Hiriburuen kasuan, bestelako koordinazio markoak adostu beharko dira.

Ikasle Abertzaleak-ek egitura edo taldeak ez dituen kasuan, Ernaiko egitura eta militanteok hutsune hauei konponbide bat emateko konpromisoa hartzen dugu. Horretarako irizpide zurrunik aurreikusi ezin daitezkeen arren, Ikasle Abertzaleak-eko ertainetako kide ohiekin betetzea lehenesten da. **Ernaik Ikasle Abertzaleak-eko taldeak osatuta ez dauden tokietan eratzeko ardura izango du.**

Unibertsitateak

Ekin Euskal Eskola Nazionalari eta EH Eraiki ildoek duten lotura kontuan hartuz, hauen dinamizazio politikoa Ikasle Abertzaleak-en esku garatuko da. Gazte Estrategiaren eta Ezker Abertzalearen zenbait ildo unibertsitateetan garatzeko, unibertsitateetan Ernaiko taldeak sortzeko apustua egiten dugu. Talde hauek

osatzen dituzten kideek Ikasle Abertzaleak-en ere militatzea lehenesten da. Honekin Ikasle Estrategia lehentasunezkoa izatea bilatzen da, eta ditugun hutsuneak betetzea, IA-k koiuntura politikoarekiko duen izaera definitu arte.

Harremanean sakondu eta koordinazioa eta hausnarketak konpartitzeko ondorengo antolakuntza eskema jarraituko dugu:

Koordinazio markoak

Herrialdeko edo eskualdeko dimentsioa hartuko duten markoak dira. Partaideak Ernaiko herrialdeko/eskualdeko kideak, Ikasle Abertzaleak-eko kanpus arduradunak eta Ernaiko unibertsitateko taldearen arduraduna izango dira. Behar eta aukerei erreparatuz ertainetako Ikasle Abertzaleko arduradunak parte hartzea positiboa izango da, argazkia osatuagoa izateko eta koordinazio osoa mahai baten bueltan emateko.

Ikasle eta Gazte Estrategiaren arteko koordinazioa aurrera eramango da, koiunturaren kudeaketan asmatuz eta elikadura politikorako eta hartu emanerako marko bilakatuz. Ezin dira kudeaketa marko huts izan.

Ikasle Abertzaleak-en esku geratuko dira EEEN ildoak (hezkuntza ildoak) eta EH Eraiki ildoko funtzio orokorrak. Ernaiko taldeen funtzioa Gazte Antolakundearen eta Ezker Abertzalearen beharrak unibertsitatean betetzea izanik, honen diseinua Ikasle Estrategiaren diseinuaren ondoren garatuko da.

Ernaiko taldeak

Kanpus mailan antolatuko diren taldeak izango dira eta dinamizatorako arduradun bat egongo da. Ernaiko militantez osatuak izango dira, lehenetsiz marko hauetan parte hartzen duten kideak Ikasle Abertzaleko militanteak ere izatea.

Jarraikotasunez lan egiteko gai izango diren taldeak osatuko ditugu, ez dugu talde handirik bilatzen. Bide beretik, haien herrietatik kanpo ikasi eta bizi diren militanteak batzea lehenesten da.

Hezkuntza ildotik haratago garatu beharreko behar estrategikoak eta erreferentzia lantzea izango dira funtzioak. Funtzioak ez zapaltzeko, talde hauen kidegoa ikasle problematika eta antolakundearen murgilduta egongo da, eta talde hauen dinamizazio-arduraduna beste koordinazio markoetan beteko duen papera garrantzitsua izango da.

Garapen estrategikoko lanketak egitea lehenesten dugu, egunerokoari erantzuteko dinamiketan erori ordeztu (batzuetan ezinbestekoa izango den arren).

Ernaiko taldeen arduraduna

Ernaiko taldeak kanpus mailakoak direnez, Kanpus mailako arduradun bat izango dute; beraz, kanpus bakoitzean arduradun bat egon beharko da. Kasu honetan Ikasle Abertzaleak-eko bizitza organikoan integratuta egongo da ezinbestean. *Koordinazio markoaz gain*, Ernaiko taldeen arduradunak Ikasle Abertzaleak-eko Kanpuseko eskualdean parte hartu beharko du.

Oso garrantzitsua da Ernaiko taldeen arduradunak marko honetan parte hartzea, agenda eta egitasmo guztiak kudeatzen diren lekua delako. Horrela, egitasmoek ez dute elkar zapalduko eta militante perfilen arteko aldentzea ekidingo dugu.

Kide honen ardura Ernaiko taldeen egitasmoak kanpuseko agenda orokorrarekin bateratzea izango da, eskualdeko hausnarketa orokorren parte izateaz gain.

Ernaiko kideen elikadura politikoa

Tokian toki Ernaiko kideek eta arduradunak Gazte Antolakundeaz duten elikadura politikorako eta plangintzen eta egitasmoen diseinurako tresnak osatu beharko dira.

Lanbide Heziketak

Lanketen nolakotasunagatik eta ikasketa zikloen berezitasunagatik ez da Ikasle Abertzaleak Lanbide Heziketetan antolatuko. Eremu lokalean harremana mantentzeko formulak garatu beharko dira Ikasle Abertzaleak-en ildo mobilizatzailerokorrarekin zubiak eraikitzeko. Plangintzek ikuspegi sozioekonomiaz gain hezkuntza perspektiba txertatuta izateko, ikasle eta gazte antolakundearen artean diseinatuko da eremu honetako plangintza nazionala.

Beraz, eremu honetan borroka aurrera ateratzeko eginkizuna ikasle eta gazte militante ororena den bezala, Ernairi dagokio borroka horiei jarraipena egitea.

Militantziaren funtzioak

Hezkuntza problematikaren pisu estrategikoagatik, Ernaiko militantziak ikasle mugimenduak aktiboki parte hartuko du; Ikasle Abertzaleak erreferentziazko antolakundea izango da. Hezkuntza ildoaren garapenez harago hezkuntza eremuak duen garrantziaz jabetuta, Ernaiko militantziaren prestutasuna ezinbestekoa da eremu honetan Ezker Abertzaleak dituen eginkizunetarako.

ANTOLAKUNTZA

ETA

FUNTZIONAMENDUA

7. Funtzionamendua

Gure militantzia egunerokotasunean nola garatzen dugun da funtzionamendua. Nola harremantzen garen, nola eztabaidatzen dugun, garrantzia zeri ematen diogun, zertan inbertitzen dugun denbora... Atal honetan zehar ikusiko dugun bezala, hobetzeko asko dugun eremua da.

Hainbat erronkari heldu nahi diogu funtzionamenduari dagokion atal honetan. Ezker Abertzaleak, eta beraz, guk geuk bizi dugun momentuaren berezitasun eta garrantziagatik, irudimentsuak eta apurtzaileak izatea dagokigu; modu berriak irudikatu eta aurrera eramaten saiatzea, erronkak markatzea... finean, arriskatzea. Hobetzeko eta eraldatzeko anbizioa izan behar dugu. Zerbaitek funtzionatzen ez duela ikusten badugu, beti dugu aldatzeko aukera. Baina konformatu beharrean, hobeak izaten saia gaitezen!

7.1/ Funtzionamendu orokorra

7.1.1. Baloreak, gure praktikaren oinarri

Gure proiektu politikoa lortzeko dugun berme bakarra gu gara, eta gure praktikekin gaurdanik eraldatzeko gai garena, gure proiektu politikoa egunero egiten baitugu; ez da aldarrikapen soil bat, filosofia eta praktika bat da.

Gu geu gara eraldaketarako dugun tresnarik eraginkorrena. Gure jarreraren bidez, eraikitzen ditugun harremanen bitartez, eguneroko erabaki txikiekin eraldatzen dugu ingurua. Zapalkuntza sotilenen aurrean boteretuta, agerikoak baldintzatuz. Mikrotik makrora eta makrotik mikrora eraikitzen dugu bestelako eredua. 24 orduz militante garelako diogunean, gure bizitzako esparru guztiak eraldaketarako espazio direla esan nahi dugu, balore eta praktika iraultzaileak horietara guztietara eraman behar ditugula.

Azken urteetan hainbestetan errepikatu izan dugun bezala, kapitalismoaren eta patriarkatuaren baloreetan oinarrituko ez den herri bat eraikiko badugu, gaurdanik balore horiek eraldatzen ditugulako izango da.

Gure praktikak aldatuta bakarrik ez da nahikoa: gu aldatzeak ez du mundua aldatzen, aldaketa hasi baino. Praktika iraultzaile hori estrategia baten baitako urrats eta proiektuekin zabaldu behar da, eta modu kolektiboan garatu. Iraultza gudan hasten da, baina ez da gudan amaitzen!

7.1.2 Norabide bikoitzeko konpromisoak: Nik kolektiboari eta kolektiboak niri

Antolakundeko kide garen momentutik, kolektibotasun handi baten parte gara, eta borroka ezberdinen garapenerako, beharrezkoa da kideon funtzioez argi hitz egitea. Gutako bakoitzak egiten duenak kidego guztiarengan eragina dauka. Honenbestez, militanteok eta antolakundeak konpromiso jakin batzuk izango ditugu, elkar elikatuko dugu.

Kolektiboak niri:

Antolakundearen inguruko informazio ahalik eta osatuena jasotzea. Informazioak boterea ematen digu; antolakundearen betebeharra da botere desoreka horiek minimoak izatea. Informazioaren kudeaketa garden eta horizontala sustatuko dugu.

Antolakundearen erabaki estrategikoetan parte hartzea. Antolakundea guztion artean egiten dugun heinean, erabakien kolektibotasuna sustatu behar dugu. Militante guztion eskubidea izango da antolakundeak horretarako espazio egokiak eskaintzea.

Militanteok eskubidea izango dugu antolakundearen partetik formakuntzarako beharrezkoak izan daitezkeen bitartekoak jasotzea, eta hauek lantzeko espazioak sortzea.

Zaintza hirukoitzaren bidean, gure egoera pertsonalarekin loturiko erabakiak hartzeko bermeak eskainiko dira, eta erabaki hauenganako errespetua ziurtatuko da.

Nik kolektiboari:

Erabakitze markoetan parte hartzea ezinbesteko konpromisoa izango da kide guztientzat. Eskaintzen diren espazioetan gure parte hartzea bermatu beharko dugu: espazio hauen adierazpide nagusia Ernairen Bilgune Orokorrak izango dira. Militante guztiok bertan erabakitzen diren aferekiko erantzukizuna izango dugu, eta erabaki hauei lotu beharko gara. Honek ez du kritikarako aukera deuseztatzen, kritikak bideratzeko espazio egokiak baliatuko ditugu.

Eraldaketa gugandik hasten da: militanteon bizi ereduaren eraldaketa lehentasunezko konpromisoa izango da; bizi eredu eraldatzaileen bidean pausuak ematea, guztion ardura.

Guztionez ardura izango da pentsamendu kritikoa lantzeko tresnak eskuratzea, bai kolektiboki bai pertsonalki. Guztiok eskainiko diogu tarte bat formakuntzari eta garapen teoriko zein praktikoari. Kolektiboki harturiko konpromisoak beteko ditugu; besteenganako errespetuz jokatzeko ezinbestekoa da antolakunde batean. Guk harturiko lanak betetzeak berebiziko garrantzia du, besteon lanak ez oztopatzeko.

Antolakundeko ardurez gain, militante orok bestelako konpromisoak hartu beharko ditu Ezker Abertzalean eta Gazte Mugimenduetan. Gazte Estrategiaren garapenerako, antolakundearen barnean eta kanpoan hartzen ditugun konpromisoek balio berdina daukate; oso garrantzitsua da gure ekarpenak Gazte Mugimenduetan egitea, eta bertan ikasitakoa antolakundera ekartzea.

Ernaik organigrama eredu hierarkiko bat du, ordezkartzan oinarritua. Garrantzitsua da antolakundearen hausnarketa espazioetan parte hartzea: erabakia hartzen den espazio zehatzean pisua jarri beharrean, hausnarketa eta erabaki prozesuan jarri behar dugu. Erabakiak prozesu baten ondorioen arabekoak dira, eta horrela legitimatu egiten dira, gure egiten ditugu. Honek ahalduntze handia eskatzen du. Hausnarketak eta erabakiak modu parte hartzailean hartzeak hartutako erabakiekiko konpromisoa dakar, erabaki kolektiboak geure egin eta gauzatzea. Kolektibotasunak pisu handi bat hartuko du militantzian: militantzia kolektiboa da. Talde baten parte garenez, taldeak erabakitakoa gailentzen zaio norberaren lehentasun eta interesei.

Prozesu hauek kolektibizatzeak erabakiak hartzera ausartzea dakar; horretarako ere, norbanakoen ahalduntzea garrantzitsua da. Maiz ikusi ahal izan dugu ondorio politikoak izango dituen erabaki bat hartzeko momentuan atzera egitea, ezgauza sentitzea, beste norbaiten esku utzi nahi izatea... erabakiak hartzeak horren ondorioen erantzule izatea ere badakar. Horregatik da garrantzitsua ahalduntzea, baina horregatik da garrantzitsua kolektibotasuna: erabaki bat hartu baina errazten bagara, elkarrekin egingo dugu estropezu, eta elkarrekin altxatuko gara berriro ere.

Ezin dugu ahaztu parte-hartzea oso desorekatua izaten dela adin, esperientzia, genero, arduraren zehatzen eta beste aldagai batzuen arabera. Gero eta zabalagoa eztabaida gunea, gero eta nabarmenagoa da parte-hartze desorekatua. Beraz, parte-hartze metodoei erreparatu behar diegu gehiago, erabakitze-prozesuari garrantzia emanez, hausnarketa horiek benetan kolektiboak izan daitezen, eta ez elementu batzuk batzen dituztelako hitz egitera ausartzen direnena.

7.1.3 Ernaitik Ezker Abertzalea sortuz

Ezker Abertzalea antolakunde ezberdinetan antolatzen den mugimendu politiko bat baino zabalagoa da. Hala ere, Gazte Antolakundeak estrategikoki bidelagun ugari dituen arren, mugimendu politikoa artikulatzen duten hainbat egiturekiko harreman organiko berezia dugu.

Ernai Ezker Abertzalearen baitan atalean zehaztu bezala, Sortu Ezker Abertzalearen erreferentzia politiko den heinean, Gazte Antolakundeko militanteoi bertan parte hartzeko formulak birpentsatzea dagokigu. Zentzu horretan, Gazte Antolakundeko militanteok Sortzaile izango gara, Sortun dagokigun maiztasunarekin eta intentsitatearekin gure ekarpena eginez. Sortuk antolatuko dituen hausnarketa eta erabakigune desberdinetan parte hartuko dugu: tailerrak, herri batzarrak...

Aitzitik, aurreko atalean aipatu bezala, Ernai bera Gazte Estrategia garatzeko eta Ezker Abertzalearen ildo politikoa gazte esparrura egokitzeko arduraduna denez, bertan garatu beharko dugu gure jardun militantea.

Ezker Abertzalearen baitan borroka sozialerako ezinbesteko aliatua dugu LAB sindikatua. Azken urteetan lantzen hasi garen aliantzari jarraipena eman eta

ekimen, mobilizazio zein proposamenak elkarrekin egiten jarraitzea ezinbesteko ikusten dugu.

Gure erreferentzia politiko-instituzionalak diren EHBildu eta EHBai-ra gazteria erakartzea ere badagokigu, haien erreferentziak gaztetuz eta gazte perspektiba eremu horietan txertatuz.

7.1.4 Militantzia zikloa

Gazte Antolakundetik pasatzen garenon bizipenak anitzak dira, praktika eta ibilbide militante zein pertsonala ezberdina den bezala. Ernain lanean ematen ditugun urteei kritikoki erreparatu behar diegu, hauetan zehar pertsona bezala eta etorkizuneko militante gisa osatzen garelako: bizitza osoan zehar garatuko dugun militantziaren oinarriak hemen jartzen dira.

Azken urteetan militantzia zikloaren aldaketa bat bizi izan dugu. Orokorrean, gero eta beranduago hasten gara militatzen, eta zikloa luzatzeko zailtasunak ditugu. Horrez gain, ez ditugu fase bakoitzak dituen beharrak ongi betetzen, eta askotan ardura berriak behar bezala prestatu gabe hartzen ditugu, transmisio egokirik gabe. Honek koste handia dauka antolakundearentzako eta militanteontzako. Erroka honi behar bezala heltzeko, irizpide hauek proposatzen ditugu:

Zikloaren betebeharrak antolatuen plana: Militante guztiok zikloaren fase berdinak bete beharko genituzke, militantzia modu osasuntsuan ematen dela bermatzeko.

Sarrera: antolakundean sartzean edo ardura berri bat hartzean, sarrera denbora bat beharko dugu, aurreko arduradunaren transmisioa jasotzeko, gure burua kokatzeko, formakuntzak ezberdinak jasotzeko (sartze mahaiak, adibidez).

Ardura egonkorra eta bizipen desberdinak: tarte honetan gure militantziaren gorenear egongo ginateke, kokapen on batekin, arduraren ezagutza maila handiarekin etab. Urte hauetan zehar, ardura eta funtzio desberdinak aldatzen joango gara, gure ezagutza eta interesak zabalduz.

Amaiera: garrantzia izango du ardurak gradualki uzteak, eta datozenei transmisio egokia egiteak. Honetarako, errelebo plan zehatzak osatuko ditugu, gure erreleboekin konpartituak izango direnak. Azken fase honetan, gure militantzia bereziki eremu batean edo ildo batzuei lotuta ere garatzea gerta daiteke, ardura desberdinak ezagututa, lehentasun argiago batzuk ditugulako.

Gazte Antolakundeko kideon militantzia ez da gazte ziklo honekin bukatzen: gazte konpromisoa bizitza militante oso baten hasiera besterik ez da, hamaika borroka eremuentzako eskola. Horregatik, gazte militantzia ziklo honek Ezker Abertzaleko beste antolakunde batzuetan zein herri mugimenduetan ekarpena egiten jarraitzen du.

7.1.5 Militantzia sostengarria

Sistema kapitalista heteropatriarkalaren inertzia desberdinak gure bizitza militantero ekartzearen ondorioz, askotan guk geuk produktibitatea edo emaitzak lortzea jartzen dugu erdigunean, militanteak, pertsonak, alboratuz. Presak, emaitza prozesuaren gainetik baloratzea, ZENBATari begiratzea NOLARI beharrean, eraginkortasunaren izenean parte hartzea sakrifikatzea... Azken urteetan asko landu dugun kontua da.

Militantzia proiektu bat eraikitzeko bide kolektiboa denez, balio bera izan behar duten hiru erpinez osaturiko triangelua dela ulertu behar dugu. NIMilitantea-GUtaldea-Proiektua (politikoa). Horien orekan garatzen dugu militantzia. Izan ere, pertsonaren beharrezan ez badie talde edo proiektuak, pertsonak erretzea eta militantzia uztea da lortzen duguna, eta, pertsonaz osaturiko mugimendua garen heinean, proiektua baldintzatzen dugu. Era berean, talde osasuna zaintzen ez duen mugimendua, lan kalitatea baldintzatzen du. Hala ere, taldea edo norbanakoa proiektuaren aurretik kokatzen dituen mugimenduak ere nekez egingo du aurrera. Elkarren menpekoak diren hiru erpin dira, eta baten hutsuneak, beste biei eragingo diete.

Oreka hori zaindu behar dugu, bidea zaindu, bidea bera delako borroka. Prozesu feministan eta beste espazio batzuetan militantzia sostengarriaren inguruan hitz egin badugu ere, gure egunerokotasunean inertzien pisu handia izaten jarraitzen dute. Bide honetan urratsak ematen jarraituko dugu, barne prozesuen bidez, aurrerago azalduko dugun Barne Antolaketaren bidez...

7.2/ Funtzionamendu feministarantz

Ezker Abertzaleko militantzia eredu maskulinitate eredu hegemonikoaren arabera izan dela iritzi konpartitua da. Alde batetik, jendartearen isla direlako mugimendu sozial zein politikoak, eta beraz, balore patriarkalen gainean antolatu direlako; eta bestetik, euskal gatazkak, eta bereziki, askapen mugimenduaren kontrako errepresioak, eredu hori indartu eta muturrera eraman dutelako.

Konpartitua da, era berean, askapen mugimenduan borroken hierarkizazio bat egin dela: ildo eta borroka batzuk lehenetsi dira eta beste batzuk atzeratu edo alboratu. Errepresioak mugimendu gisa baldintzatu gaituela zalantzan jarri gabe, baztertzeko horiek justifikatzeko aitzakia izan dira askotan. Feminismoa izan da alboratutako borroka eta etxerako lan horietariko bat.

Mugimenduak lanketa feminista bat egitea atzeratzeak begi-bistakoak diren ondorioak izan ditu: egituretan emakume gutxi egotea, borroka batzuk guztiz maskulinizatuta egotea, lidergoa dakarten arduetan gizonak egotea, emakumeek militantzia lehenago uztea eta gutxitan berhartzea... baina hain agerikoak ez diren ondorioak ere baditu: neskek euren burua funtzio zehatzak betetzeko "gai" ez sentitzea; ardurak betetzeko modu "maskulinoak"... Hori ekiteko garaia da!

Ernai sortu genuenean, feminismoarekiko apustu irmoa egin genuen, horrek gure

praktikan eta antolaketa ereduak isla bat izan behar zuela jakitun. Baina etxea ez da teilatutik eraikitzen hasten, eta antolakuntza eta funtzionamenduari heldu aurretik, lehenengo gudan, militanteengan, oinarri feminista bat sortu behar genuen. Horri erantzun dio lau urteko prozesu feministak: erronka honi ekiteko baldintzetan kokatu gaitu.

Antolakuntza eta funtzionamenduari dagokionez, jardun feministagoa izan dezagun mekanismoak eta tresnak martxan jartzea izango da kongresu prozesu honetako erronketako bat.

7.2.1 Arduradun ereduak eraldatzen, erreferentziak sortzen...

Militantzia eredu maskulinizatuaren adierazpen gorenetarikoa da antolakundeetan funtzio zehatzak edo ardura politikoak betetzen dituzten kide gehienak mutilak izatea. Prozesu feministak iraun duen urteetan zehar, arrazoi asko landu ditugu horretarako:

Bizitako sozializazio prozesuaren ondorioz gizonezkoek batez ere gorpuzten dituzten jarrera eta gaitasunak baloratuak izatea.

Lehiakortasuna, norberaren buruarengan konfiantza, indar fisikoa...

Nesken ahalduz behar besteko inbertsioa egin ez izana. Urte hauetako lanketa ez da bizi osoko barneratze prozesua gainditzeko gai izan. Emakumeoi gure burua etengabe zalantzan jarri eta gutxiesten irakatsi digute, inguruko ondoan txiki sentitzen... baina ez hori bakarrik: inguruko mutilak baino zorrotzago epaitzen gaituzte. Baloratuak izateko, lan bikoitza eskatzen zaigu. Horrek ondorioak ditu antolakundearen egiturari.

Norberaren bizitzako eremu pribatutik bizi dugun presioa eta ematen diogun garrantzia. Familia-ardurak, ikasketekiko presioa, gain-babesa... neskak eta mutilok modu desberdinetan pairatu eta bizi ditugula aztertu dugu. Ondorioak ditu egiturari: alde batetik, gazte militantzia bukatu eta urte batzuetara, neska gehiagok lehenesten dute enplegua edo familia, eta militantzia utzi; bestetik, proposatu zaien ardurak eremu pribatu horretarako denbora gutxiago utziko badie, tentsio handiagoarekin bizi, eta askotan ardura ez hartzea erabakitzen dute. Horrek erronkak zabaltzen ditu: ardura bat betetzeko eskatzen dugun konpromiso maila zalantzan jartzea, generoaren arabera baldintza desberdinak baditugu, horiek kontuan hartzea...

Ondorioz, arduradun politiko gehienak mutilak izan dira, eta dira. Horrek ardura horiek betetzeko moduan, eta gerora, nola garatu behar diren ulertzeko moduan eragina izan du. Arduradunei maskulinitate eredu hegemonikoaren araberrako ezaugarriak eskatzen zaizkie: denetarik jakitea, euren buruarengan konfiantza izatea, jendaurrean mintzatzeko jakitea, karisma edukitzea, zalantzarik ez edukitzea, autoritatea... Gatazka politikoaren ondorioak gehitzen badizkiogu, ezaugarri berriak gehitzen dizkiogu: tentsioa eta beldurra gainditzea, disonibilitate handia, bizitza pribatu edo pertsonala bigarren mailan uztea, norberak esandakoa zalantzan jartzen ez uztea, oldartzen jakitea... jaso eta

exekutatzea.

Elementu horiek batzerakoan, sozializazio prozesuaren ondorioz, neskak baztertuak geratzen gara. Militantzia zikloa bera ere sozializazio prozesu bat den heinean, eta neskon borrokarekiko konpromisoa ere oso altua delako, asko eta asko izan dira eurentzako naturalak ziren muga horiek gainditu eta ezaugarri horiek eurenak egin dituztenak.

Honek ez du inola ere esan nahi maskulinitate hegemonikoari lotu zaizkion ezaugarri horiek denak baztertu behar ditugunik: horietako batzuk balioan jartzen jarraitu behar dugu, eta orain arte balioa eman ez zaien beste batzuk, indartu.

Beraz:

Eraketa egiteko modua aldatzen joan behar gara. Goitik beherako transmisioetik, hausnarketa eta erabaki kolektiboak hartzea bultzatuko duten dinamizatzaileretara. Horrek barne mailan formakuntza politikoa eskatuko du. Entzuten jakitea; galderak, eta ez erantzunak, luzatzen jakitea; taldea osatzen duten pertsonen kezkatzea... Horretarako prestakuntza eskaini behar du antolakundeak eta norberaren militantzia zikloak: ezin da norberaren ardura izan, ikasita jaiotzen diren "aukeratu" batzuk bagina bezala.

Arduradun eredu aldatzeko, profil desberdinen aldeko apustua egin behar dugu. Aniztasunak aberastu egingo gaitu.

7.2.2. Interlokuzioa: informazioa, erabakiak... gurekin ala ez!

Emakumeon erreferentzia, parte-hartzea eta erabakimena bermatzeko, Ernaik beste jende batekin konpartitzen dituen espazioetan neskak egon daitezten esfortzu berezia egingo dugu.

Lehenik, kanpora begira Ernairen ordezkariak emakumeak izateak, emakumeen ikusgarritasuna indartzen du. Bigarrenik, Ernairen interlokuzioa emakumeak izanda, emakumezko erreferentziak sortzen dira, eta beste eragile batzuetako ordezkariak (gizonak, normalean) eurekin jardun beharko dute. Herri Mugimenduan feminismoaren eta emakumeen paperaren indartzeko beste modu bat da. Hirugarrenik, espazio horietariko asko bereziki maskulinizatuak daude: gure apustua izan behar da emakumeak horietan sartu eta erabakimena ematea.

Azkenik, erabaki garrantzitsuenak hartzen diren espazioetan edo hausnarketa estrategikoak ematen direnetan, emakumeak egoteko esfortzua egingo dugu. Ikuspegi feminista espazio horietara eramateko, eta bereziki, gaur gaurkoz maskulinizatuak dauden heinean, emakumeak erabaki horietatik baztertuak daudelako.

Beti ez da posible izango, eta neskentzako gain karga suposa dezake. Gainera, ez dugu lorontzi bihurtu nahi, kalitatezko ekarpen bat egin nahi dugu. Beraz, eremu bakoitzean hausnartu beharko dugu zein diren espazio horiek, eta baldintzak

dauzkagun. Konbinazio desberdinak pentsa ditzakegu: txandakatzea, neska eta mutil bana elkarrekin joatea, bi neska joatea...

7.2.3. Antolakunde feministaren oinarria... ahalduntako neskek!

Ernai antolakunde feminista izateko ezinbesteko baldintza eta berme bakarra, neska militanteak ahalduntuta egotea da. Nahi beste landu dezakegu feminismoa mutilekin, baina dagokigun espazio okupatzen dugunera arte... ez dugu parekidetasunean lan egingo. Horregatik, gure ahalduntzean egin behar dugu inbertsiorik handiena. Formazio politikoa ikuspegi feministatik indartzeko, feminismitik Askapen eta Gazte Mugimenduak nola irauli pentsatzeko, elkar ezagututa sareak eraikitzeke... espazioak sortuko ditugu. Horri begira, bi espazio bereiziko ditugu:

Eztabaida edo ekimen zehatzei begira, gure buruak ahalduntzeko espazioak. Nazionalak edo herrialdekoak izan daitezke, erraztasunaren arabera, eta ez dute maiztasun zehatz bat izango, beharrianaren arabera baizik. Borondatezkoak izango badira ere, kontziente izan behar dugu gerora duten garrantziaz.

Formakuntza politikari begirako neskekentzako asteburu-pasa. Neska militanteon formakuntzan apustu indartsu bat egitea da proposamena, militantzia eremu mistoetan bizi dugun desoreka gainditzeko. Bereiziki maskulinizatuak dauden ildoen inguruan, jendaurrean aritzearen inguruan, tradizionalki mutilei egotzi zaizkien kontu desberdinen inguruan trebatzeko... eta nola ez, gure zapalkuntza bera espazio berdinetan konpartitzen duten kideekin aliantzak eraikitzeke. Herrialdeka edo eskualdeka izango dira, batzeko eta antolatzeko erraztasun gehiago emateaz gain, militantzia eremuak konpartitzen dituzten nesken arteko aliantzak eraikitzea errazten du eta. Ernaiko neskekentzako derrigorra den espazio bat izango bada ere, irekiak izatea da proposamena, beste espazio batzuetan militatzen duten Gazte Mugimenduetako neskek ere parte hartu ahal izateko.

7.2.4. Barne antolaketa: talde osasuna funtzio bihurtzen

Esan bezala, hutsune handienak gure egunerokotasunean ditugu: lan banaketak egiteko modua, generoaren arabera taldean zein paper betetzen dugun, gugandik zer espero den, erabakiak nola hartzen ditugun, garrantzia zeri eta nori ematen diogun...

Ezinbestekoa da taldeko mikropolitikei arreta eskaintzea. Iraultza gugandik eta gure taldetik hasten da! Beraz, aztertu eta landu egin behar dugu, hausnarketa ezin da terapia hutsean geratu.

Zentzu horretan, bi tresna/funtzio bereiziko ditugu:

Mikroskopia eta behatzailea. Taldearen jarduna mikroskopiaaren bidez aztertuko dugu. Bileren aurrelanketa eta garapena aztertzeko

tresna izango da: hainbat puntu barnebiduko dituzten taula banatan, bileraren aurrelanketa, garapena eta zehaztutako lanak nola joan diren jasotzen joateko orri bat izango da. Bilera bakoitzeko bat beteko dugu. Elementu batzuk izango ditugu aztergai:

Bileraren aurrelanketa. Gai ordena denok ezagutzen genuen, antolaketa banatu dugun (dinamizatzailea, aktalaria...), bakoitzak bere puntua prest ekarri duen, eginda ekarri beharrekoak hala egin diren, puntualak izan garen, asistentzia zelakoa izan den eta zergatik...

Parte-hartzea bileran. Hitzartze kopurua, hitzartze horietako zenbat hasi diren beste kide bati moztuz, zenbat izan diren galderak edo zalantzak, zenbat hasi diren norberaren hitzari balioa kentzen (“ez dakit, baina...”, “agian tontakeri bat da baina”...), zenbatetan altxatu den ahotsa, gorputz adierazpena nolakoa izan den, zenbat ekarpen izan diren proposamenezkoak, zenbat kexak, adi egon garen...

Lan banaketa. Hartutako lanak nola banatu diren suposatzen duten lan karga edo denboraren arabera, baita lanak taldean edo banaka hartu ditugun ere.

Elkarrekin gauden bestelako espazioak. Bilera osteko potea, pankartak edo bestelako lanak egiten elkarrekin pasatzen dugun denbora... Egoera horietan nola harremantzen garen, zein jarrera ditugun, zein aliantza eraikitzen diren eta horiek taldean zein eragin duten...

Nola jakingo dugu hori guztia bilera ostean? Nola egin bilera bera etengabe moztzen egon gabe? Bileran, kide bat **behatzailea** izango da, eta bileraren parte hartzearen arabera, taula betetzen joango da: hitzartze gehienak mutilenak izan dira, norbaitek gainerakoak mozteko joera nabaria du, neskek beti hasten dituzten esaldiak aurrez esango dutenari garrantzia kentzen, eztabaida bat hastean denok sutu eta formak galdu ditugu, hizkera ez sexista erabili da, 3 pertsona etorri dira lanak egin gabe...

Behatzaile izatea egokitzen zaionaren parte hartzea oso baldintzatuta egongo da bileretan: adi egoteak, hitza hartzea zailduko dio; agian, esateko moduei hain adi egonda, esaten denari hain adi ez egotea ere bai. Horregatik, funtzio hau ez da iraunkorra izango, txandakatuko dugu. Talde bakoitzak erabakiko du zein maiztasunekin egingo den. Mikroskopiaoren eta behatzailearen paperaren bidez, 2 helburu lortu nahi ditugu: alde batetik, **bileren nolakotasunari arreta jarri eta eraldatzen joatea;** eta, bestetik, **talde osoaren ardura izatea, kontzientzia bat sortzea,** momenturen batean betaurreko horiek denok jartzea.

Jasotako informazio guztiarekin “behaketa saio” bat egingo dugu hilero edo bi hilero: tarte horretan behatzailea izan denak eta barne antolaketa arduradunak mikroskopia guztiak eta aktak aztertu eta balorazio bat egingo dute. Horretarako

gidoi proposamena ere mikroskopiaan egongo da.

Egiturako espazio iraunkor guztietan erabiliko da mikroskopia: nazional zein herrietan, ildoetako sareetan...

Barne antolaketa arduraduna. Barne antolaketa arduraduna taldearen eta kideen osasunaz arduratuko da:

Lanen banaketari adi egotea, kide batzuek gainezka egin ez dezaten, beste batzuk karga gutxiago duten artean. Era berean, rolen arabera banaketari erreparatzea.

Taldean tarte bat hartu duten kideekin harremana mantentzea, baita astean zehar kanpoan dauden ikasleekin ere.

Militantziaren ondorioz kideek eduki lezaketen egoera animikoari, edo militantzian eragin dezakeen egoera animikoari adi egotea eta egokien ikusi bezala jardutea: taldean hitz egin, kafe baten bueltan... Baina pertsonala kolektiboa dela buruan, talde zaintza apur bat egitea.

Aipatutako kontu horiek guztiak talde osoaren ardura izan beharko balira ere, denon ardura diren beste gauza asko bezala, ez dira inoren esku geratzen. Beraz, barne antolaketa arduraduna kontzientzia bat, ohitura bat sortu arteko bitarteko bat izango da. Edonola ere, barne antolaketa arduraduna NI-TALDEA-PROIEKTUAREN oreka, militantzia bizigarria eta landu ditugun kontuak aintzat hartzen ditugula bermatzeko tresna bat da. Beraz, horrek ez du esan nahi kontu horiek bere ardura eskusiboa direnik: denon ardura dira, baina berak buruan eduki beharko du.

Funtzioa gutxienez ikasturte batez beteko da, eta gero aldatu. Gure militantzia zikloan zehar denok izango gara noizbait, baina modu egokian garatzeko denbora bat behar dugula kontuan hartuta.

7.2.5 Betoa eta planteamenduen errebisio feminista

Betoa, erabaki bat hartzerakoan, neskei errefortzu positibo bat ematea izango da. Eztabaida batean ikuspegi feministatik desadostasuna badago, eta neska guztiak edo gehiengo oso nabari bat ados badaude, arrazoia automatikoki eurei emango zaie. Esan bezala, ikuspegi feminista izan behar da horretarako arrazoia.

Bestalde, erabaki batzuek berrikuspen feminista bat jasotzea ondo legoke: irismen estrategikoa dutenek, lehenetsunak ezartzen dituztenek... Hurrengo urteetan definitu beharko dugu beto hau nola egikaritu daitekeen, irizpideak zehaztu...

7.3/ Jardun deszentralizatuen oinarria: autonomia

Gazte Estrategiaren atalean azaldu dugun moduan, jardun deszentralizatuen

filosofia praktikara eraman nahi dugu. Baina, horretarako, neurri zehatzen beharra dugu; bestela, nekez lortuko dugu filosofia horren arabera jardutea.

Herri, auzo edo eskualdeetako lanketak antolakundearen dinamika politikoan pisu gehien dutenak dira, gure jardunaren oinarria. Tokian toki, Gazte Estrategiaren egokitzapenak egiten ditugu, eta ondorioz, tokian tokiko zuzendaritza lana egiten dugu. Beraz, **tokian toki autonomia beharrezkoa da**, dagozkien markoei eskumenak emanaz eta egituraren marko ezberdinetan erabakigune eta prozedurak zehaztuz.

Autonomia eta eskumen horiek ulertzeko modu kolektiboa eraiki behar dugu, bakoitzaren subjektibotasunaren arabera irizpide desberdinak erabiltzea saihesteko. Irizpide eta neurri komunak beharko ditugu horretarako:

Ernaren dinamika edo kanpaina propioen diseinurako prozeduretan, diseinu nazionalak tokian tokiko markoek beraien errealitatera moldatu baino, diseinua egiteko ardura duten markoek bilatu beharko dituzte prozedurak (kontraste ariketak, ideia jasotzeak...) diseinua bera errealitate guztietan baliagarri izateko. Edonola ere, diseinu orokorrak errealitate desberdinetarako balio beharko badu, horrek ez du kentzen errealitate zehatzetan lanketa sakonagoa egiteko tokiko bitarteko propioak sortzea.

Eskaintza sozialetik independentismoa indartzeko ekinbideetan, dinamika bakoitzari dagokion lurralde-irismenaren arabera markoei eta soilik marko horiei dagokie diseinuak egitea. Horren arabera, marko puntualak sortu daitezke (Hego Euskal Herrikoak, EAEko hiru herrialdeenak, nafarrak...).

Erronka nazionalen (ez dinamika propioen) itzulpenen diseinuan, tokian tokiko markoek egin beharko dituzte erronka propioak edota herrialdekoak. Horien arabera, herrialdeei zein eskualde eta herri/ auzoek izango dute zeresan handia.

8. Antolakuntza

Azken urteetan Gazte Estrategia aurrera eramateko bidean topatu ditugun oztopo asko egon dira antolakuntza eta funtzionamenduarekin lotuta: konpromiso desberdinak uztartzeko ezintasuna, maskulinitate eredu hegemonikoaren arabera rolen erreproduktzioa, etengabe bileretan egotea, funtzionatzeko modu desberdinak dituen jendearekin lan egiteko ezgaitasunak, harreman zuzenei balio gutxi ematea, egitura informazioaren transmisiorako bakarrik erabiltzea, informazioa ondo ez erabiltzea, beti azken momentuan gauzak aurrera ateratzen ibiltzea...

Honi guztiari aurre egiteko, ezinbestekoa da sortuko zaizkigun beharriaz erantzuneko dien antolakuntza eredu bat diseinatzea. Maiz inertiaren arabera antolatzen gara eta funtzionatzen dugu, eredu hori garatuko dugun estrategiari

erantzuteko egokiena den zalantzan jarri gabe. Antolakuntza estrategia baten araberakoa izan behar da. Era berean, ondo pentsatu beharreko kontua da: estrategiarik onenak ere porrot egin dezake gaizki antolatu edo jardunez gero.

8.1/ Nazio egituratzeaz

Ipar Euskal Herriak dituen ezaugarriak eta mugimendu abertzalearen ezaugarritzearen ondorioz, Aitzina Gazte Antolakundeak sortu zen orain dela hiru urte. Nabariak dira nazio strategiaren norabidean urratsak eman ez izanaren ondorioak. Gaur gaurkoz, honela deskribatu daiteke egoera hau, lau hitzetan:

Azken urteetan bi antolakundeen arteko harremanak hutsune handiak izan ditu. Ondorioz, bi antolakundeek emandako hausnarketak marko politiko eta teoriko ezberdinetan garatu dira. Euskal Herria nazio gisa aintzat hartzen duen iruditegia osatzeko zailtasunak areagotzen ari dira gazteriaren baitan. Elkar ezagutzaren galera ematen ari da. Bi antolakundeek gazte problematikaren argazki partziala dute gaur egun.

Beraz, gure ustetan agerikoa da nazio estrategia garatzeko logikari erreparatu eta behar horren mesedetan bideorria zehaztea. Bideorria bera bi antolakundeek elkarlanean garatu beharreko ibilbidea izan beharko da, zerumugan antolakunde bakarra sortzeko ekimen politikoari uko egingo ez diona. Beraz, uneko erronka nagusia nazio estrategia izateko baldintzak sortzea izango da. Hau da, nazio estrategia garatzean jarri behar ditugu esfortzu handienak. Lau lerro irudikatzen dira bideorriaren zehaztapenean:

Elkar ezagutzuz. Tartean, elkar ezagutzarako eta lankidetzaren errealerako planteamenduak garatuko ditugu, jakinda egun planteamendu ezberdinetatik abiatzen garela eta gai honi ez diogula behar beste denborarik eskaini. Lerro honi erantzunez, egoera politiko eta ekonomikoaren analisi konpartituak, GMen azterketa konpartituak, saretze nazionalak, brigaden garapenak, Hegoaldeko militantziari bideratutako mintegiak, etab. egin daitezke.

Harremanduz. Gazte Mugimenduetan eta, oro har, gazterian zabaldu daitezkeen dinamikak. Lerro honek Euskal Herria eta euskal gazteria subjektu gisa gazte borrokaren iruditegian jasotzen lagundu dezake.

Antolatuz. Progresiboki, egituraz Gazte Antolakunde bateratua osatuz joango gara. Atal honetan, aipamen bat merezi du ezin dugula Ipar Euskal Herriko militantzia gurean hartu. Denon baldintzetara egokituko den antolaketa ereduak martxan jarri beharko dugu. Jardun deszentralizatuen logikari jarraiki dagokion autonomiaz jardunez elkarrekin antolatzekeko prozesuaz ari gara. Beste herrialdeek bezala baina pisu bereziarekin, Ipar Euskal Herriak zuzendaritza propioa izango du.

Eztabaidatuz. Prozesu independentistari lurralde agendetatik egin beharreko ekarpena zehazte aldera abiatu daitezkeen eztabaida bateratua.

8.1/ Militantzia osoa batzen duten espazioak

Militante orok iritzia eman, hausnartu, eztabaidatu eta erabakiak hartzeko eskubidea du, eta egitura osoan zehar horretarako espazioak eraiki behar ditugu.

Hausnarketak militantziak osatzen dituen espazio desberdinetan emango badira ere, horrek ez du alboratzen, hausnarketarik garrantzitsuenak emateko, ahalik eta militante gehien batzen diren espazioak beharrezkoak direnik. Gazte Estrategiaren zehaztapenari buruzko hausnarketak, kurtso bakoitzeko plangintza ixtekoak... Eztabaida estrategikoagoak batzuk, eta epe labur-ertainean erantzutekoak beste batzuk, baina zalantzarik gabe, potoloak diren eta gai orden bateko puntu bat baino lanketa sakonagoa eskatzen duten hausnarketak, errealitate desberdinak bizi ditugun militanteak elkarrekin eztabaidatzen jartzeak bereziki merezi eta behar dutenak. Espazio hauek esfortzu handi bat suposatzen dute asistentzia, denbora eta aurrelanketa. Baina ezinbestekoak dira erronka komunak markatu eta ondoren norabide eta txip berean eragin dezagun.

8.1.1. Bilgune Orokorrak

Bilgune Orokorrak Ernai sortu zenetik jarri ziren martxan, eta euren garrantzia berresten dugu. Urtean behin Ernairen militantzia osoa hausnarketarako batzen garen espazio bakarra da, eta ikasturte horretako zein hurrengo urteetako norabidea markatzen da bertan.

Hori da bere funtzioa: Gazte Estrategia berrikusi, hurrengo urratsak hausnartu eta epe labur-ertaineko erronkei forma ematea. Batzuetan eztabaiden orokortasunagatik bertan landutakoak garrantzirik ez duela badirudi ere, hausnarketa sakonagoen oinarria da bertan jartzen dena, eta beraz, aurrera begira denok oinarri beraren gainean lan egiteko ezinbestekoak dira. Ezinbestekoa da ulertzea, erabaki handiak ez direla egun bakarrean hartzen, prozesu bat direla, BOetan hasten den prozesu bat.

Horregatik, Bilgune Orokorren garrantzia berretsi, eta edozein kasutan, hauek hobetzea izango da hurrengo urteetako erronka.

8.1.2. Herrialdeko bilguneak

Bilgune Orokorrak, batzen duten kide kopuruagatik eta epe luzeko ikuspegia lantzeko direlako, urtean behin bakarrik batzen badira ere, epe laburrean ditugun erronken kokapen eta zehaztapena egiteko Herrialdeko Bilguneak ditugu. Bertan herrialde bakoitzeko militantzia osoa batzen da, herri bakoitzeko gutxieneko asistentzia herri/auzoko arduraduna delarik.

Beharrian arabera deitzen da. Kasu honetan ere, bere garrantzia berresten dugu, bereziki lehenago aipatutako hausnarketak modu kolektiboan emateko beharri dagokionez. Espazio hauetan, momentuan momentuko zuzendaritza markoek epe laburrean ditugun erronken inguruan egindako planteamenduak kontrastatzen eta osatzen dira; zalantzan jarri edo aldatzeko momentu egokia da.

Bestalde, orokorrean hauen asistentzia oso ona izaten bada ere, oso desorekatua

izan da eskualdeka. Era berean, parte-hartzea oso desorekatua izaten da adin, esperientzia, genero, ardura zehatzen eta beste aldagai batzuen arabera. Beraz, parte-hartze metodoei erreparatu behar diegu gehiago, hausnarketa horiek benetan kolektiboak izan daitezen.

8.2/ Herri eta auzoak, antolakundearen oinarri

Gazte antolakundearen oinarria dira herrietako eta auzoetako Ernaiko taldeak: bertako jarduna da antolakundearen ildo hezurmamitzen duena, eta egiturek hauen zerbitzura egon behar dute. Auzo eta herrietan jokatzeko dugu batez ere gure partida, herrietan gorpuzten delako eraldatu nahi dugun errealitatea. Horregatik antolatzen gara ahalik eta eremu lokalenetan, eta horregatik ponentzia honetan arreta berezia jarriko dugu herrien funtzionamenduaren atalean.

Euskal Herriko gazte antolakuntzaren ibilbide oparoan zehar milaka eztabaida eman izan ditugu afera honen inguruan, eta planteatu diren moldeak anitzak eta dinamikoak izan dira, errealitate aldakorrari men eginez, betiere gazteon beharrei erantzuteko ahaleginaz. Fase honetan ariketa honi heltzeko momentua heldu zaigula deritzogu.

Azken 4 urteetan herrietako funtzionamendua eraldatuz joan gara, herri bakoitzeko beharretara egokitzen saiatuz, eta baldintza desberdinen arabera erabaki eta praktika ezberdinak garatu ditugu. Gaur egun, erratzeko beldurrik izan gabe, oro har Zukgua sorrera prozesuan planteatu genuen antolaketa eredutik asko aldentu gara esan dezakegu; prozesu hau modu naturalean eman da. Aurrera begirako antolaketa eredu komuna definitu behar dugu oraingoan.

8.2.1. Identifikatutako hutsuneak, antolaketarako irakaspen

Arestian aipatu bezala, errealitate ezberdinei antolakuntza eredu ezberdinekin erantzun badiugu ere, askotan errepikatu izan zaizkigun elementu batzuk ditugu. Ez goaz herri guztietan gauzatu beharko dugun eredu zurrun eta eztabaidaekin bat proposatzera: argi geratu zaigu azken urteetan horrelako ariketak antzuak direla. Orokorrean baliagarriak izan daitezkeen antolaketa irizpideak proposatzea da asmoa.

Azken urteetan arazo nabariak izan ditugu konpromiso maila ezberdinak uztartzeko, eta ezintasun honek ondorio nabarmenak izan ditu antolakundearen espazio ezberdinetan. Zukgua prozesuan erabaki genuen antolaketa eredu, konpromiso maila ezberdinak barnebiltzen zituena, gutxika alboratuz joan gara, eta beste eredu batzuk sortu ditugu. Orokorrean, "Koordinazio-Bilgune" eredu ez da garatu eta talde itxiak sortuz joan gara herriz herri, disponibilitate gutxiagoko kideak edo bestelako ekarpen bat egin nahi dutenak alboratuz.

Hala ere, herri honetan milaka gazte daude gure proiektu politikoarekin bat egiten dutenak. Etorkizun hurbileko erronka gazte horiei guztiei parte hartzeko eskaintza egokiak egitean datza: haiei **proiektuaren alde egotetik, proiektua egitera** saltoa emateko aukera ematea. Antolakundeari ekarpena egiteko dauden

maila eta intentsitate ezberdineko konpromiso, disponibilitate eta gogoei bide emango dieten ereduak beharko ditugu. Denok ez dugu ekarpen berdina egin nahi, beraz, ekarpena egiteko bide bakarra egoteak ez du zentzurik. Erronka hau izango da herri honek daukan kapital militantea aktibatzen gakoetako bat. Jendartearen egoera kontuan hartuta, **militanteon lana ez da soilik guk geuk borrokak eta dinamika egitea, baizik eta gazteria aktibatzen gai izango diren eskaintzetan asmatzea.**

Orokorrean, **militantzian inbertitzen dugun denboraren ehuneko handiena bileretan ematen dugu** eta bestelako praktika batzuk garatzea eta asmatzea izugarri kostatzen zaigu oraindik ere. Ez dugu gure eguneroko jarduna egun batetik bestera aldatuko, baina pauso txikiak ematen hasi behar gara beste logika batzuen arabera, egungo jarduna besteekiko harremanetan, kaleko dinamiketan, txinaurri lanean, Gazte Mugimenduetan garatutako lanetan etab. praktikan jarriko badugu.

Militanteok antolakundearen ematen ditugun urteetan zehar eraldaketak bizi ditugu, hau da, **gure gaitasunak eta pentsamoldeak garatuz goaz praxi militantearen bidez. Militanteon aldaketa dinamikoak kontuan hartu beharko ditugu aurrerantzean,** eta ekarpenak jasotzeko eskaintzak honen arabera moldatu, militanteok antolakundearen egiten dugun ibilbidea aberasteko asmoz, eta militante guztion jakintzak antolakundearen indartzeko erabiltzeaz daukan garrantzia kontuan hartuz. Norabide honetan, militanteok aukera izan behar dugu funtzio ezberdinak betetzeko, eta antolakundeak aintzat hartu beharko du gure garapenak daukan garrantzia, eskaintza eta proposamenak eginez. Praktikaren bitartez, militante askok gure motibazioak definitzen goaz, gure praktika espezializatuz, eta askotan ere aurretik gogoz betetzen genituen funtzioek jada ez gaituzte asetzen. Aurrerantzean jakintza hori jasotzeko helburuari ere erantzuten diote ildoetako sareek, hein batean ekarpen guzti horiek jasotzera datozenak, eta hainbat militanteri lekua egitera.

Bestalde, funtzionamendu feministari lotutako atalean esan bezala, gure jarduna ezin da balore kapitalisten gainean eraiki, azkartasuna eta eraginkortasuna prozesuen gainetik, kantitatea kalitatearen gainetik etab. kokatuz, eta ezin ditugu geure buruak sentimendurik eta zaintza beharizanik gabeko errobot bezala ulertu. Beraz, **norbanakoa-taldea-proiektuaren arteko oreka** bilatzen jarraitu beharko dugu, gure praktikaren araberrako jendartearen eraikiko dugu eta.

8.2.2. Neurri proposamenak

Arestian aipaturiko arazoei aurre egiteko asmoz, honako irizpideak edo gomendioak proposatzen ditugu. Aipatu dugun logikari erantzunez, herri eta auzoak **funtzio** hauek dituzte:

Herri eta auzoko Gazte Estrategiaren diseinua eta garapena. Gazte Mugimenduen sorrera eta dinamizazioa, bereziki.

Estrategiaren garapenerako plangintzen diseinua (ildoak, komunikazioa, diruzaintza, formakuntza, talde osasuna...). Plangintza honek, ildo lokalak lantzeaz harago, ildo orokorraren lanketa barnebidu beharko du.

Herri bakoitzeko eragileekin eta bertako Ezker Abertzalearekin harremanak.

Ernairen komunitatearen etengabeko lanketa, harreman iraunkorrak sortuz eta honetarako beharrezkoak zaizkigun tresnak sortuz.

Gazte antolakuntzarako tresna eta espazioen sorrera, bertako errealitatera egokituz.

Herri eta auzoetako **antolakuntza ereduan** gutxienez bi espazio desberdin planteatzen ditugu:

Taldea:

Azken urteetako bilakaerak taldeen sorrerara ekarri gaitu, non bete beharreko funtzio gehienak betetzen ditugun. Bertan batzen garen kideak Gazte Estrategiaren lan guztiak hartzen ditugu gure gain: ildoen lanketa, Ezker Abertzaleko kontuak...

Espazio hauek mantentzea proposatzen dugu, funtzio horiekin jarraituz. Nolabait esatearren, Ernaiko militantziaren osotasunean parte hartu nahi duten kideek osatuko dute. Konpromiso maila berdina izango dute bertako kideek, beste kontu bat da lan karga euren artean nola banatzen duten.

Talde hauetan auzo edo herriak berak sor ditzakeen ardura zehatzez gain, **ardura zehatz** hauek egongo dira: egiturarekiko harremana egitea (herriko arduraduna deitzen duguna), bertako Ezker Abertzaleko gainerako antolakundeekin harremana garatzea, hezkuntza arduraduna, Barne Antolaketa, diruzaintza, ildoetako arduradunak (herriko ildoen arabera) eta, hala erabakiz gero, Komunitatearen arduraduna.

Ernaiko taldeak izango dira antolakundearen jardunaren bermatzaile nagusiak, antolakundearen bizkarrezurra osatzen dutenak.

Komunitatea:

Oinarri Sozialak osatuko du Ernairen komunitatea, gure proiektu politikoarekin bat egin, baina Gazte Antolakundearen militatu nahi ez duten edo ezin duten gazteek. Orain arte, oinarri sozialaren lanketa gorabeheratsua egin dugu, eta gazte horiek egin zezaketen ekarpen puntuala edo iraunkorra baldintzatu du horrek. Apustu irmoa egin behar dugu honi buelta emateko.

Auzo eta herri bakoitzean, Ernairen komunitateak forma ezberdina hartuko du,

baina irizpide komun batzuen arabera.

Taldea eta Komunitatearen arteko **harremana iraunkorra** izango da. Herri bakoitzak ikusiko du harreman hori nola garatu.

Taldearen eta Komunitatearen **harremanak bi norabidetan jorratuko dira**, hau da, Taldeak Komunitateari elikadura eta kokapen politikoa eman zein parte hartze eskaintzak egingo dizkio; eta Komunitateak hauek eskatu edo proposatuko ditu.

Komunitateko kide bakoitzak zehaztuko du Gazte Antolakundearekiko zein konpromiso duen eta honengandik zer jaso nahi duen.

Komunitateak ez du zertan espazio bat izan, euren burua Ernairen oinarri sozial kontsideratzen duten norbanakoak dira. Bertan **konpromiso eta disponibilitate ezberdinak** dauden gazteak aurkituko ditugu, eta eskaintzak honen arabera moldatuko ditugu. Eskaintzak ere kolektiboak zein indibidualizatuak izan daitezke.

Komunitatearen identitatean sakontzeko lanketa egingo dugu.

Komunitatearekiko lana denon artean banatuko badugu ere, Taldean erabakiko dugu arduradun orokor bat jarriko dugun jarraipena egiteko.

Taldea eta Komunitateen arteko espazioak:

Herri eta auzo orok bi espazio hauek antolatuko baditu ere, hortik aurrera toki bakoitzaren baldintzen eta irudimenaren araberakoa izango da aktibaziorako bestelako espazioak sortzea.

Gazte asko egon daitezke Komunitateko ekarpen puntualetik edo harremanetik harago, interes edo motibazioren bati lotuta konpromiso handiago bat edo ekarpen iraunkorrago bat egin nahi dutenak. Gazte Mugimenduak horretarako espazio naturala izan arren, Ernairen lotuagoak sor daitezke: lantaldeak, herrietako ildokako sareak, presoen aldeko dinamika iraunkorrak...

8.2.3. Egiturarekiko loturak

Herriak dira antolakundearen oinarri, baina ezin dugu ahaztu antolakundea ez dela gure herrira mugatzen. Antolakunde batek ematen dizkigun abantailak ukaezinak dira: gazte ezberdinak norabide berdin batean arraun egitea, gazteon baturak eta hausnarketa konpartituak, sintesi politikorako gaitasuna... Euskal Herria askatzeko garatzen dugun borroka ez dugu soilik gure herrira mugatuz lortuko, modu zabalago batean pentsatuz, ekinez eta antolatuz baizik; hortaz, egiturarekiko harremana ezinbestekoa zaigu. Orain arte kanal bakar batez egin izan dugu, eraketa aparatuen bidez, alegia. Maila ezberdinetako arduradunek antolakundearen bizkarrezurra osatu dute, eta kanal horretatik mugitu izan dira antolakundearen behar guztiak, dela eztabaida bat, dela informazio konkretu bat,

dela bitarteko ezberdinak. Honek bere funtzioa bete izan du, baina hutsuneak ere agerikoak dira.

Alde batetik, informazioaren monopolizazioa eman da herriko arduradunarengan, honek sortzen duen botere desorekarekin, eta bestetik, egiturarekin harremana ez duten kideek urruntasunez bizi izan dute askotan antolakundea. Eraketa aparatuak herrietako behar batzuk asetzeko ezintasun nabariak izan ditu, (adibidez, txinaurri lanari eta kokapen politikoari lotutakoak). Orokorrean, militanteok gure eguneroko jardunean beharrezkoak ditugun kokapen eta formakuntza bermatzeko zailtasunak egon dira. Arazo hauei irtenbidea bilatzeko, besteak beste, egiturarekiko harremana bitan banatzea proposatzen dugu.

Dagoeneko existitzen den eraketarekin harremanari, ildokako sareena gehituko litzaioke (ildokako sareen planteamendurako ikus nazio eraikuntza atala). Honela, herrietako militanteek ildokako sare ezberdinetan parte hartuko lukete, eta hauek nazio eraikuntza aparatuarekin harreman zuzena izango lukete. Honekin, militanteon ekarpenerako espazioak eskaintzen dira, baita egiturarekiko harreman berriak ere. Honela, herrietara heltzen den informazioa leku ezberdinetatik datorrela bermatuko genuke, informazio desorekak ekidinez, eta militante gehiagok edukiko genuke egiturarekin harremana eta gure ekarpena egiteko aukera.

8.2.4. Errealitate ezberdinak

Ukaezina da errealitate ezberdinek antolaketarako behar eta gaitasun ezberdinak dituztela. Euskal Herrian ez daude errealitate berdina daukaten ezta bi herri ere; ezinezkoa zaigu egon daitezkeen errealitate guztien tipologiak barnebilduko lituzkeen zerrenda bat egitea, bakoitzarentzako antolaketa proposamen zehatza eginez.

Hala eta guztiz ere, hausnarketa berezia eskatzen duten bi errealitate daudela uste dugu: hiriburuak eta herri txikiak. Biek ala biek oso ezaugarri zehatzak dituzte, eta horiei erantzuteko moduan antolatu behar gara.

8.2.4.1 Hiriburuak:

Hiriburuak, arrazoi ezberdinengatik, errealitate eta garrantzi berezia daukate. Gazte masa handia batzen den guneak dira, eta normalean, militante kopurua handia da. Foku politikoa ere badira eta plano ezberdinak uztartzen dituzte (auzoetako errealitate desberdinak eta hiriburukoa bera), hezigune handiak egon ohi dira, biztanle kopuru handia batzen dutenez jendartean oihartzun handiagoa lortu daiteke (baina aldi berean zaila da eragitea eta oihartzuna lortzea)... Horregatik, Gazte Antolakundeak hiriburuetan jardun egoki bat izatea bereziki garrantzitsua da.

Azken urteetan zailtasunak izan ditugu hiriburuetan apustuak egin eta lehentasunak zehazteko, eta Ernaiaren presentzia nahiko xumea izan da orokorrean. Aurrerantzean dinamika politiko publikoa eta propioa areagotzea ezinbestekoa izango zaigu, baina aldi berean, txinaurri lana eta Gazte

Mugimenduekiko apustua mantenduz. Kontraesan bat dirudi; horregatik da hain garrantzitsua antolakuntza ereduekin asmatzea. Norabide honetan, eraketa eta ildoetako banaketa lagungarria izan daitekeela uste dugu, baina hirugarren espazio baten beharra ikusten dugu, koiuntura politikoari erantzutekoa, alegia. Hiriburuek saltsa politiko propioa izaten dute, mediatikoki oihartzuna duena; gustatu ala ez, gazteok jokaleku horretan presentzia izatea estrategikoa dela deritzogu. Beraz, hiriburu mailako tresnak sortuko ditugu.

8.2.4.2 Herri txikiak

Herri txikien errealitateari egokitzea beharrezkoa da, plangintzek eragina izango badute eta antolakundeak eraginkorra izango bada. **Plangintzak askotan perspektiba bakarrekoak izan dira eta herri handien begiradatik eginak.** Horrekin amaitzeko mekanismoak jartzea ezinbestekoa da.

Herri txikietan militante kopurua oso murrizta da. Honek kideen lan eta ardura kopurua handiagoa izatea dakar, gazte eremutik kanpo, gainera, beste lan batzuetan inplikaturik egon ohi direlako. Bestalde, astean zehar kanpoan dauden eta asteburuetan herrira itzultzen diren militante kopurua ez da txikia, eta hauentzat espazioak sortzea hil ala bizikoa da herrietako jarduna bermatzeko. Honez gain, militanteen arteko adin-tartea handia izan daiteke, erreleboetarako zailtasunak ematen dira, "herri bat hamaika borroka" filosofia txertatzea oso zaila da eta, azkenik, gazteentzat propio sortutako espazioak urriak dira. Hala ere, borrokek pizteko aukerak batzuetan handiagoak dira, gertutasunak lana erraz dezakeelako.

Aurrerantzean, antolakuntza aldetik, eskaintza anitza egiteko beharra dago: funtzio desberdinak eskaini eta borrokarako tresna anitzak eman lanerako: Gazte Mugimenduetan, Ezker Abertzalean, bestelako erronka eta lanetan... honetarako egituratutako espazioen sinplifikaziora joko dugu, espazioak biderkatzea ekidinez, eta bertako errealitateari ekarpena egingo dieten tresnak sortuz.

8.3/ Eskualdeak

Azken urteetako bilakaeran eskualde mailako markoek garrantzi handiko papera jokatu dute Ernairen jardunean; beharizan ezberdinak asetzeko erabili ditugu. Orokorrean, herrietatik egiturarekiko harremana egiteko espazio hurbilena eta azkarrena izan dira, eta honek balio handia du, baina eskualdeen funtzioa horretara mugatuko bagenu okertuko ginateke.

Eskualdeek borroka ezberdinen mesedetara egon beharko lukete, eta ez antolakundearen barne beharrei erantzuteko. Logika hau kontuan hartuta, eskualdeak bere horretan mantenduko ditugu aurrerantzean, Gazte Estrategiaren garapenean jokatzeko duten paper garrantzitsua aintzat hartuz, baina soilik naturalki eta bertako errealitateari erantzuten diotenean. Bakarrik egituraren beharrak asetzeko sor daitezken aparatu artifizialak ekidingo ditugu.

8.4/ Nazio eraikuntza

Nazio eraikuntza aparatuak Ernaiko militantziak egunerokotasunean gazte

problematikari erantzun eta alternatibak eraikitzeko eta Gazte Mugimenduak dinamizatzeko elikadura politikoa, hausnarketa espazioak eta bitartekoak eskainiko ditu.

Hurrengo urteetan, Gazte Mugimenduak alternatibaren eraikuntzaren bidez baldintza eta eredu berriak sortzen murgilduko bagara eta aldarrikapen zehatzen inguruko mugimenduen bidez bizi baldintzak borrokatuko baditugu, proiektu horietan buru-belarri lanean gabiltzan Ernaiko militanteok Gazte Estrategiaren gaineko kokapen egoki bat izan behar dugu, borrokak norabidetzen joan ahal izateko, eta egiturak politikoki elikatzen joateko bitartekoak eskaini behar dizkigu. Borrokak norabide berean bultzatzeko gai izan behar dugu.

Horretarako, ildo bakoitzaren norabidea hausnartu eta horren jarraipena egingo dugu, beharren arabera bitartekoak sortu edo espazio bereziak eskainiko ditugu. Urte hauetan ildo desberdinak garatzeko formazio falta oztopo handia izan denez, hurrengo urteetan barne formakuntza izan beharko da indartu beharreko tresnetako bat.

Era berean, orain arte sortutako proiektuekin harremana mantenduko dugu Nazio Eraikuntza aparatuen bidez, bai ildo bati erantzuten diotenekin, bai orokorrak direnekin ere.

Nazio Eraikuntza aparatua **espazio desberdinek** osatuko dute:

8.4.1. Herrialdeka ildokako sareak

Txinaurri lana modu egokian garatzeko, borroka zehatz batean dabiltzan militanteentzako **elikadura politikoa bermatzeko zein borroka horretan garatu beharreko norabidea adosteko espazioak** eskainiko dira. Egiturako hausnarketak konpartitzeko, herrietan borrokak aurrera eramateko topatzen ditugun ezintasunen inguruan hausnartzeko, hutsune eta konponbideak identifikatzeko, borroka berean dabiltzan militanteak sartzeko, borroka bakoitzari begirako erronkak definitzeko...

Edonola ere, espazio hauek maiztasun txikiarekin batu beharko lirateke, eta ondo prestatu: ezin da hainbeste jende alferrik mugitu. Hilean edo bi hilean behin, esaterako: kurtso bakoitzean ildo horretako erronka komunak finkatzeko, ildoak garatzeko formakuntza jasotzeko, hausnarketa zehatz bat konpartitu edo emateko... Ondo prestatutako bilerak izan behar dute, ez zerotik hausnartzen hastekoak. Sare bakoitzak bere funtzionamendua zehaztu dezake, ildoaren beharren arabera.

Parte hartzeari dagokionez, borroka hori garatzen den herriko ordezkari bat izango litzateke gutxienezkoa, baina aurrera begira, ahalik eta kide gehien batzea izan beharko litzateke gure anbizioa. Ez da informazioa transmititzeko espazio bat, hausnarketa eta erabaki-gune bat baizik. Beraz, lehen eskutik bizitzea egokiagoa da.

Gaur gaurkoz militantzia mugitzea kostatzen zaigu: saiakerak egin izan dira antzeko zerbait egiteko, eta salbuespenak salbuespen, huts egin dute. Horregatik da hain garrantzitsua ondo prestatutako bilerak izatea, parte hartzaileentzat aberasgarriak. Motibazioa eta borroka horretan sinestea izango dira sareen indar nagusia eta gakoa.

Borroka berean dabilzan militante guztiak batzeak, esfortzu handia suposatzen badu ere, indargune handiak ditu: hausnarketak zuzenean berau garatuko duen kidegoarekin emateak barneratuko dela eta adostasuna dagoela bermatuko du; erabakiak jende gehiagoren artean hartzeak zilegituko du; militantziaren ahalduntzea indartuko du... Azken batean, ildo baten inguruan hausnartzeko, ildo hori garatzen dagoen jendea da egokiena.

Sareek orain arteko lantaldeak ordezkatzeko lituzkete, baina, funtzio batzuk airean ez geratzeko, eta bilerak ondo prestatu zein herri bakoitzaren borroka horren jarraipena egiteko, herrialdeko sare bakoitzak lantalde motore txiki bat edukiko du. Lantalde hori, herrialde eta ildoaren arabera, desberdina izango da. Ideia sare bakoitzeko 2-3 pertsonako lantalde txiki bat osatzea da. Hala ere, koordinazio lanak egingo lituzke: bilerak prestatu, ezer airean geratzen ez dela bermatu, jarraipena egin, eta beharrezkoa baldin bada, beste eragile batzuekin kanpo harremanak. Sor daitezkeen gainerako funtzioak sareko kideen artean banatuko dira, erabakiak zein ardurak demokratizatzeko. Formakuntza bat prestatu, proposamen bat ekarri, testu bat idatzi... Batez ere formakuntza eta hausnarketarako espazioak izango direla kontuan hartuta, lana ahalik eta gehien sakabanatzea da asmoa.

Kontuan hartu behar dugu (edo hori da gure helburua gutxienez), sare hauek gehitzen joango direla: gaur gaurkoz borroka bakoitza ez da herri askotan garatzen, baina horiek biderkatzea da xedea. Beraz, sareko partaideak ere biderkatu egingo dira. Beraz, asistentzia, maiztasuna, metodologia... ere moldatzen joan beharko gara.

Herrialde bakoitzeko sarea ildo bereko beste 3 sareekin harremanetan egongo da. Azken batean, bakoitza bere berezitasunekin, baina estrategia berari erantzuteko norabide berean joan behar dira, aukera baldin badago apustu komunak egin... Herrialdeka batu arren, Hego Euskal Herriko sare bat osatzen dute. Horretarako, euren arteko harreman zuzena (batzuetan geratuta, medio informatikoen bidez...) izango dute, baita herrialdeko nazio eraikuntza arduradunaren bidezkoa ere.

8.4.1.1. Ildo desberdinetako sareak

Funtzioak: Ernairi dagokion urteko plangintza diseinatzea; Gazte Mugimenduetan ildoak izan beharreko garapenez hausnartu eta txinaurri lanaren bidez hori norabidetzea; funtzio horiek betetzeko beharrezko bitartekoak sortzea.

Bestelako funtzioak: ildo bakoitzean ditugun aliatuekin harremana eta planteamendu komunak garatzea. Koiunturaren arabera sortzen diren marko

desberdinetan (eraso zehatzei aurre egiteko plataformak, asanbladak, mobilizazietarako kanpaina bateratuak...) izan beharreko parte hartzeari buruz apustuak egin ala ez erabaki.

Osaera: Borroka hori garatzen duten herrietako militanteak (gutxienez herriko bana).

Epe laburrean lana, feminismo eta etxebizitzako sareak sortzeko apustua egingo baldin badugu ere, epe ertainean gehiago sortzea da ideia, borroka desberdinak pizten doazen heinean.

8.4.1.2. Formakuntzako sarea

Funtzioak: barne formazioa prestatzea: Ernaik Ezker Abertzalean duen papera, Gazte Estrategia eta urteko plangintza kontuan hartuta, militantziaren jarduna indartzeko beharrezko formakuntza politikoa eskaintzea. Beharra ikusten denean, koiuntura baliatuta edo honi erantzunez, saio zein bitarteko desberdinak ere eskaini ahalko dira. Ernairen Eskola Politikoaren antolaketa.

Bestelako funtzioak: sartzeko eta errotze mailen edukia eta metodologia. Formakuntza hori prestatzen lagun gaitzaketen gainerako eragileekin harremana.

Osaera: ildoko arduraduna eta eskualdeetako ildoko arduradunak.

Maiztasuna eta funtzionamendua: X hilean behin batuko da sare osoa (herrialdeka ala nazionala). Ildo honetan, proiektuaren arabera lantaldeak osatuko dira (eremu geografikoaren arabera egin daiteke): Eskola Politikoa antolatzekeo bat, beste bat sartzeko mailak antolatzekeo... Lantaldeak borondatez osatuko dira, baina lan banaketari behatuta.

8.4.1.3. Hezkuntzako sarea

Funtzioak: hezkuntza arduradunek Ikasle Estrategiaren eta ikasturte bakoitzean hezkuntza eremuko plangintza eta erronken gaineko kokapen egokia dutela bermatu eta jarraipena egitea.

Bestelako funtzioak: Ikasle Abertzaleak-ekin eta hezkuntzako gainerako eragileekin harremana eta elkarlana garatzea.

Osaera: ildoko arduraduna, herrialdeetako ildoko arduradunak/kontaktuak eta borroka hori garatzen duten herrietako militanteak (gutxienez herriko bana).

Maiztasuna eta funtzionamendua: urtean behin batuko da, ikasturte hasieran, hezkuntza arduradunen funtzioak eta ikasturteko erronkak lantzeko. Hortik aurrera, ildoaren jarraipena egingo da ikasturte osoan zehar, herrialdeko arduradunen bidez. Horrek ez du baztertzeko beharren arabera sarea batzea.

9. Barne prozesuak

9.1/ Helburuak

Eraldaketa gugandik hasten dela argi badaukagu ere, oztopoz eta kontraesanez beteriko bidea da. Azken batean, gu ere sistema kapitalista heteropatriarkalean hezitako gazte alienatuak gara. Ikasi eta barnerarazi dizkiguten norgehiagokaren kulturaren, genero rolen eta aurreiritzien kontra borrokatu behar gara etengabe.

Zorionez, askotan baietz dirudien arren, ez da sistemaren aurka aurrera eraman beharreko borroka indibiduala. **Militantzia sistemaren aurka modu kolektiboan** borrokatzea da. Ditugun hutsune eta indarguneei ezinegon berdinak dituzten kideekin erreparatzea, autokritika egitea, elkar laguntzea, amore ematen ez uztea. Elkarrekin estrategiak diseinatuz, boteretzeko (eta pribilegioak ukatzeko) tresnak sortuz, urratsak emanez, kontraesanak elkarrekin kudeatuz... eraldaketarako subjektuen sorreran, ezinbestekoa da militantzia eremuetan sortzen den konfiantza. Horregatik, **antolakunde iraultzaile batek**, eta are gehiago bizi osorako borrokara lotuko diren gazte belaunaldiak osatzen duten antolakunde batek, **militantziak balore jakin batzuen arabera jarrera eta jarduna izateko bitartekoak jarri behar ditu**.

Ernairen kasuan, funtzio hori bete dute, eta aurrerantzean ere bete beharko dute, barne prozesuek. Balore iraultzaileen inguruko oinarritzko formakuntza bat bermatzeaz gain, **gure jardunean eta jarretan aldaketa bat ematea da prozesu hauen helburua**. Beste eredu bat eraiki nahi duen antolakundeak, beste eredu horren ispilu izan behar duelako. Beraz, prozesuek dimentsio indibidual zein kolektiboa dute.

Edonola ere, Ernaik ingurua eraldatu nahi duen heinean, ezin da barne formakuntzara begira bakarrik dagoen antolakunde bat izan. **Militante iraultzaileen eskola bat gara, zalantzarik gabe, baina eskola horrek teoria eta praktika uztartu behar ditu**, ez dugu ez kaleetatik ez inolako borroka espazioetatik desagertu nahi, eta ondorioz, barne prozesuen edukiak gainerako lan ildoekin batera jorratu behar dira. Formakuntza militantea eta jardun militantea osatu eta uztartu egin behar ditugu.

Horrek **prozesuak epe luzera diseinatu, eta lehentasunak eta desorekak markatzera** behartzen gaitu. Dena egin nahi izateak ezin gaitu ezer ganoraz ez egitera eraman.

9.2/ Prozesu feminista

Lau urteko prozesua martxan jarri genuen Ernai sortu eta gutxira, antolakunde eta militantzia feminista lortzeko bidean oinarri bat jartzeko. Hasieratik argi genuen lau urtetan ez zela bitzta osoan barneratutako balore sistema irauliko, baina urrats handiak eman ditugu.

ZUKGUA prozesuan eman zen eztabaida nagusietako bat izan bazen ere, egun inork ez du zalantzan jartzen ez Ernai antolakunde feminista izan behar denik, ez feminismoa gure helburu estrategikoetako bat izan behar denik. Izugarritzko

urratsa da hori.

Kaieraren bidez egindako lanketaren ondorioz, feminismora hurbilpen handia egin dugu: feminismoaren oinarriak barneratu, eta gure proiektu politikoan izan behar duen zentralitateaz ohartu gara. Neska gazteon ahalduntzea bultzatu dugu, antolakundeetan bertan zein Gazte Mugimenduetan, eta mutilen pribilegioak identifikatzen hasi gara, berauei uko egiteko ezinbesteko urratsa.

Hala ere, hutsune nabariak ditugu oraindik: ahalduntze horrek ez ditu militantzia eremuetan neskok ditugun oztopo guztiak gainditu oraindik; hitza hartzea kostatzen zaigu, inposatu zaigun genero rolari loturiko funtzioak betetzen jarraitzen dugu, oso neska gutxi daude arduraren politikoetan, mutilek feminismoaz hitz egiteak ez ditu feminista bilakatu, militantzia feministaz eztabaidatu arren gure bizitzetan ez dugu iraultza feminista egin, pertsonala eta politikoa bereizten jarraitzen dugu... Parte hartzeari dagokionez ere, nabaria izan da nesken artean askoz altuagoa izan dela, mutilen artean oso gorabeheratsua izan delarik.

Lau urte hauek hasiera besterik ez dira izan. Sortu ditugun baldintzak hurrengo urratsak diseinatzeko abiapuntua dira, barne prozesu feministaren bigarren fasearen abiapuntua. Kontzientzia feminista piztu dugu; praktikan sakontzen jarraituko dugu.

9.3/ Prozesu internazionalista

Prozesu internazionalista oso gorabeheratsua izan da. Antolakundeak duen lan karga ikusita eta lehentasun batzuk jartzea beharrezkoa den heinean, internazionalismoa formakuntzarako bitartekoen bidez, zehar-lerro gisa eta testuinguruaren araberrako bitartekoen bidez landuko dugu.

Bestalde, ildo bezala ere neurri batean landu beharko genuke. Nahiz eta gaia ildo bezala lantzea ezin den gure lehentasuna izan, herri desberdinok borroka beraren parte garena eta elkarren arteko elkartasuna ezinbestekoa dela ezin dugu inoiz ere ahaztu; gure borroka aurrera eramatea da egin dezakegun ekarpen internazionalistari onena. Horretarako, maila lokalean eta herrialdeka sortzen diren elkartasun plataformak edo sareetan parte hartzen saiatuko gara, baldintzen arabera.

Horrez gain, Gazte Mugimenduetan boterearen eraikuntzan buru-belarri garen honetan, elkartasunetik haratago, asko dugu bestelako herrietatik ikasteko.

9.4/ Formakuntza

Formakuntza politiko ezinbestekoa da militante batek bere jarduna garatzeko: sistema kapitalista heteropatriarkalaren funtzionamenduaren gainekoa, Ezker Abertzalearen ingurukoa, aurrera eraman beharreko borroken ingurukoa, gazte boterearen ingurukoa... Elikadura politiko hori jasotzeko arduraren kolektiboa zein indibiduala da, baina lehen plano horretan, antolakundeari dagokio bitartekoak modu ordenatuan eskaintzea.

Horretarako, formakuntza plan baten diseinua osatuko dugu, orain arteko baliabideak zein berriak uztartuz. Horrez gain, urtero espazio berezi batzuk

izango ditugu.

Sartze mailak. Militante hasiberrientzako saioak izango dira: denok joan beharko dugu gutxienez behin. Ernaiko militante batentzako oinarritzko ezagutzak landuko dira bertan, eta edukia antolakunde osoan berdina izango bada ere, eskualdeka egingo ditugu.

Eskola Politikoa. Eskola Politikoa Ernaik eskainiko duen formakuntza asteburu irekia izango da. Urtez urte toki desberdin batean ospatuko dira. Bertan momentuaren arabera egokia iruditzen zaigun formakuntza eskainiko da.

Formakuntza buruan izan eta garatuko dugula bermatzeko, hau da, etengabe atzeratzen ez joateko, duen garrantzia kontuan hartuta, formakuntza arduradunak edukiko ditugu eskualdeka, eta sare bat osatuko dute (Nazio Eraikuntzako atalean sakontzen da).

9.5/ Euskara

Azken urteetan ikusi ahal izan dugu euskararen erabilpenean ere hutsune nabaria dugula. Toki askotan euskara bilerak egiteko hizkuntza da (edo hori ere ez). Baloreekin esan bezala, eredu sozialista eta feminista gure praktikaren bidez eraikitzen dugun bezala, herri euskalduna ere gugandik hasten da. Horregatik, antolakundeak afera honi balio politikoa eman eta barne lanketa bat egitearen beharra ikusten dugu.

Eremu honetan oraindik asko diseinatzeko dugun arren, buruan izan behar dugu tokian tokiko errealitateak aintzat hartuz eremu honen lanketa egiteko ekintza plan bat diseinatu beharko dugula. Horretarako, hasierako abiapuntu gisa Gazteraikei Gazte Mugimenduen autogestio topaketetan euskarako ildoan sortutako euskalduntze gida erabiliko dugu.


Zirtaka!

“Zirta batetik sua bizituko da!” iragartzen zuen *Iskra (Zirta)* aldizkari komunistak 1917ko sobietar iraultzaren atarian. Munduko iraultzaileon itsasargia izan zen iraultza sobietikotik 100 urte beteko diren honetan Euskal Herriko gazte iraultzaileok zera diogu: Sua bizitzeko zirtaka aritzeko konpromisoa hartzen dugu!

«¡Ése es el pueblo, el que sufre todas las desdichas y es por tanto capaz de pelear con todo el coraje! A ese pueblo, cuyos caminos de angustias están empedrados de engaños y falsas promesas, no le íbamos a decir: “te vamos a dar”, sino: “¡aquí tienes, lucha ahora con todas tus fuerzas para que sean tuyas la libertad y la felicidad!”» - Fidel Castro Ruz

Mundu berri baten hazia gure bihotzetan daramagulako,

Zirtaka ariko gara!



ernai
aske izateko